

清

史

稿

清史稿

本紀十二

高宗本紀三

二十一年春正月庚午以額駙科爾沁親王色布騰巴勒珠爾貽悞軍機褫爵
禁錮貽喀爾喀親王額琳沁多爾濟以疏縱阿睦爾撒納處斬己卯以準噶爾
故總台吉達什達瓦之妻率衆來降封爲車臣默爾根哈屯命尹繼善往浙江
會審鄂樂舜丁亥阿巴噶斯得木齊哈丹等來降乙未命哈達哈山阿爾泰進
兵協勦原任副將軍薩喇勒由珠勒都斯來歸命與鄂勒哲依同掌副將軍印
命協辦大學士達勒扎阿由珠勒都司進兵協勦丁酉致仕協辦大學士阿克
敦卒二月癸卯授巴里坤辦事大臣和起欽差大臣關防戊申以楊廷璋爲浙
江巡撫辛亥上啟蹕謁孔林以策楞奏報獲阿睦爾撒納命改謁秦陵甲寅上
謁秦陵免直隸山東經過州縣錢糧十分之三歉收地方免十分之五乙卯上
幸山東詣孔林免山東海豐等三縣潮災額賦壬辰賑山東蘭山等州縣水災
癸亥賑浙江仁和等十五州縣場水災甲子工部尙書衛哲治病免以趙宏恩

代之策楞以誤傳獲阿睦爾撒納奏聞丁卯命薩喇勒以副將軍駐特訥格爾
戊辰授領色爲湖廣總督郭一裕爲雲南巡撫三月己巳朔上至曲阜謁先師
孔子廟授清保爲盛京將軍庚午釋奠禮成謁孔林少昊陵元聖周公廟免曲
阜丁丑年額賦辛未賑山東鄒縣等十七州縣衛水災丙戌免江蘇宿遷被災
河租湖北潛江等五州縣上年水災額賦丁亥命哈達哈進兵烏梁海布延圖
以青滾雜卜車布登爲參贊大臣策楞等奏復伊犁戊子免安徽宿州等二十
一州縣衛江蘇阜甯等七十二州縣衛上年水災額賦壬辰上謁昭西陵孝陵
景陵詣孝賢皇后陵奠酒丙申賜鄂樂舜自盡丁酉上還京師夏四月壬子免
山東鄒縣等十九州縣衛上年潮災額賦命達勒黨阿由西路哈達哈由北路
進征哈薩克以哈密阿鄂實爲參贊大臣癸丑命大學士傅恒赴額林哈畢爾
噶整飭軍務策楞玉保建問以烏勒登疏縱阿睦爾撒納處斬甲寅命尙書阿
里袞在軍機處行走丁巳召傅恒回京富德奏敗哈薩克于塞伯蘇台壬戌免
山西岢嵐州二十年霜災額賦癸亥軍機大臣雅爾哈善劉綸罷命裘曰修在

軍機處行走乙丑召劉統勳回京五月戊辰朔王保降領隊大臣以達勒黨阿爲定邊右副將軍巴祿爲參贊大臣乙亥免浙江仁和等十三州縣上年被災額賦庚辰上詣黑龍潭祈雨乙酉以莽阿納達什車凌爲參贊大臣丁亥免甘肅甘州等三府本年民屯額賦賑甘肅皋蘭等二十廳州縣上年霜雹災辛丑噶勒雜特宰桑根敦等來降壬子以莽阿納爲歸化城都統癸丑何國宗降調以趙宏恩爲左都御史調汪由敦爲工部尙書劉統勳爲刑部尙書丙辰伯什阿噶什屬宰桑賽音伯克來降癸亥杜爾伯特台吉伯什阿噶什遣使來降命封親王乙丑封杜爾伯特台吉烏巴什爲貝子秋七月戊辰免安徽無爲等三十二州衛上年水災額賦壬申特楞古特宰桑敦多克及古爾班和卓等於濟爾瑪台詐降哈達哈等率兵殄之授哈達哈領侍衛內大臣車布登扎布郡王唐喀祿舒赫德副都統三都布多爾濟公爵餘議叙有差庚辰漕運總督瑚寶卒以張師載代之丁亥上幸清河至班第鄂容安喪次賜奠壬辰以青滾雜卜叛跡已著諭舒明成袞扎布等捕剿之癸巳庫車伯克鄂對等來降八月壬寅

以綽爾多爲黑龍江將軍乙巳命喀爾喀親王成袞扎布爲定邊左副將軍舒明阿蘭泰桑齋多爾濟德沁扎布塔勒瑪善爲參贊大臣辛亥命納木扎布德木楚克爲參贊大臣以保德署綏遠城將軍癸丑上奉皇太后秋獵木蘭磔阿巴噶斯等于市戊午賑車臣汗部落扎薩克輔國公成袞等六旗旱災額魯特達瑪琳來降庚申上奉皇太后巡幸木蘭行圍授瑚圖靈阿富昌保德哲庫納阿爾寶爲參贊大臣隨成袞扎布辦事以保雲署綏遠城將軍壬戌台吉伯什阿噶什入覲召見行殿賜宴癸亥予成袞扎布等議叙甲子以喀爾喀貝勒品級車木楚克扎布接續台站封爲貝勒乙丑哈達哈等征哈薩克大敗之授扎拉豐阿爲貝子明瑞爲副都統賑陝西長安等十三廳州縣雹災九月甲戌達瓦齊近族台吉巴里率人戶來降命附牧扎哈沁地方丁丑土爾扈特台吉敦多布達什遣使臣吹扎布入貢上召見於行幄賜宴戊子免甘肅乾隆元年至十五年積年欠賦及寧夏安西等二十二州縣衛本年額賦有差庚寅上奉皇太后回駐避暑山莊授杜爾伯特親王伯什阿噶什爲盟長乙未暹羅國王遣

使貢方物賑山東魚台等縣水災閏九月癸卯封羅卜藏車楞之子塔木楚克扎布爲貝勒戊申上奉皇太后回蹕庚戌授阿桂爲北路參贊大臣准借黑龍江被水人戶籽種口糧甲寅上奉皇太后還京師賑安徽宿州等十二州縣衛水災辛酉免江蘇清河十二州縣衛被災漕項冬十月戊辰命哈達哈以參贊大臣隨同成衮扎布辦事阿里衮富德回京壬申以富勒赫未能豫防河決召來京命愛必達爲河道總督劉統勳署之調鶴年爲山東巡撫授尹繼善兩江總督兼管河務癸酉以滿福爲巴里坤都統丙子兆惠以回部霍集占叛狀聞遣阿敏道等進兵戊寅輝特台吉巴雅爾叛掠洪崔爾拜扎哈沁命甯夏將軍和起討之己卯賑直隸延慶等八州縣衛本年水災霍災乙酉致仕大學士福敏卒十一月丁未賑甘肅皋蘭等二十六廳州縣水霍災辛亥調陳宏謀爲陝西巡撫圖勒炳阿爲湖南巡撫甲寅命仍逮問策楞玉保降封扎拉豐阿公爵以達勒蘇阿爲定西將軍兆惠爲定邊右副將軍永貴爲參贊大臣庚申哈薩克錫喇巴瑪及回人莽噶里克率衆襲將軍和起于闐展和起力戰死之命如

傅清拉布敦例卹己未黃廷桂奏備馬三萬匹增兵駐哈密等處上以明決擔當嘉之賞黃廷桂雙眼花翎騎都尉世職壬戌王安國病免以汪由敦署吏部尙書趙宏恩署工部尙書何國宗署左都御史十二月甲子朔策楞玉保逮京途次爲額魯特人所害庚午賑山西汾陽等縣水災辛未諭哲布尊丹巴胡圖克圖加號敷教安衆喇嘛壬申以盧焯爲湖北巡撫賑山東金鄉等二十一州縣衛水災甲戌免陝西整屋等四縣本年水災民屯額賦馬廠地額賦之半戊寅獲青滾雜卜于杭噶獎噶斯賞成袞扎布黃帶封子一人爲世子封納木扎勒一等伯己卯召瑚圖靈阿等回京以獲青袞雜卜功管貝勒車木楚克扎布郡王品級賞貝勒旺布多爾濟等雙眼花翎丙戌達勒黨阿罷協辦大學士以鄂彌達代之

二十二年春正月甲午以南巡免江蘇安徽浙江累年逋賦以成袞扎布爲定邊將軍由巴里坤進勦車布登札布署北路定邊左副將軍舒赫德富德鄂實爲參贊大臣色布騰巴勒珠爾阿里衮明瑞等爲領隊大臣乙未賑江蘇清河

等十九州縣水災戊戌命嵩椿爲荊州將軍以莽吉賚爲參贊大臣赴北路軍營己亥命哈達哈爲參贊大臣駐科布多庚子以哈爾阿永貴爲參贊大臣癸卯上奉皇太后南巡甲辰授汪由敦吏部尙書調何國宗爲禮部尙書秦蕙田爲工部尙書趙宏恩仍回左副都御史白鍾山爲江南河道總督張師載爲河東河道總督楊錫紱爲漕運總督授愛必達江蘇巡撫丙午免直隸靜海等三州縣逋賦丁未免經過直隸山東地方本年錢糧十分之三被災地方十分之五壬子賑山東濟甯五州縣衛水災癸丑以阿思哈爲北路參贊大臣己未以嵇璜爲江南副總河命阿桂留烏里雅蘇台辦事壬戌噶勒藏多爾濟達什車凌等叛二月癸亥朔免經過江南浙江地方本年錢糧十分之三被災地方十分之五甲子賑江蘇清河十四州縣衛安徽宿州等四州縣衛災民丙寅兆惠全師至烏魯木齊封一等伯世襲丁卯上奉太皇太后渡河至天妃閣閱木龍免江南乾隆十年以前漕項積欠免兩淮鹽戶乾隆十七年至十九年未完折價銀兩乙亥上奉皇太后渡江癸未幸宋臣范仲淹高義園甲申上奉皇太后幸

蘇州府乙酉上奉皇太后臨視織造機房調富森爲吏部尙書以納木札勒爲工部尙書降阿里袞爲侍郎以兆惠爲戶部尙書領侍衛內大臣舒赫德爲兵部尙書命成袞札布兆惠分路捕勦額魯特叛衆丙戌上閱兵於嘉興府後教場丁亥上閱兵於石門鎮己丑上奉皇太后幸杭州府庚寅上閱兵辛卯免山東齊河等三州縣民欠及山西汾陽等二縣江蘇清河等十二州縣水災額賦三月丁酉噶勒藏多爾濟陷伊犁命成袞札布討之庚子上奉皇太后駐蹕蘇州府己酉上奉皇太后幸江甯府免江南之江甯蘇州浙江之杭州三府附郭諸縣本年額賦庚戌上奠明太祖陵輝特台吉車布登多爾濟叛哈達哈討獲之命盡誅丁壯以女口賞喀爾喀辛亥以哈達哈爲兵部尙書癸丑上奉皇太后渡江甲寅召原任大學士史貽直入閣辦事黃廷桂仍以大學士兼管陝甘總督丙辰免陝西潼關等廳州縣上年水雹災額賦召劉統勳赴行在己未上奉皇太后渡河夏四月壬戌朔直隸總督方觀承劾奏巡檢張若瀛擅責內監僧人上斥爲不識大體仍諭內監在外生事者聽人責懲乙丑免江蘇淮安等

三府州地畝額賦命劉統勳督修徐州石工侍郎夢麟督修六塘以下河工副
總河薩爾哈修昭關滾壩支河均會同督撫總河籌辦召成奎札布兆惠舒赫
德等來京以雅爾哈善爲參贊大臣掌定邊右副將軍印命阿里衮駐巴里坤
辦事丙寅上至孫家集閱隄工唐喀祿獲車布登多爾以普爾普部人賞烏梁
海丁卯上渡河至荆山橋韓莊閘閱河工戊辰免直隸延慶等州縣衛二十一
年雹災水災額賦庚午減山東海豐縣屬黎敬等五莊糧額並免十一年至二
十年通賦以松阿里爲綏遠城將軍獲普爾普辛未上至闕里釋奠先師孔子
上奉皇太后駐蹕靈巖命史貽直仍以文淵閣大學士兼吏部尙書乙亥改松
阿里爲涼州將軍以保德爲綏遠城將軍戊寅免山東濟甯等五州縣通賦己
卯調將炳爲河南巡撫以阿思哈爲湖南巡撫庚辰免河南夏邑等四縣通賦
辛巳以夏邑生員段昌緒藏吳三桂僞檄命方觀承赴河南會同圖勒炳阿嚴
鞠之乙酉何國宗罷丁亥上還京師命秦蕙田署禮部尙書戊子以前布政使
彭家屏藏明末野史褫職逮問以歸宣光爲禮部尙書庚寅福建廈門火丁酉

上詣藍靛廠迎皇太后居暢春園乙巳賜蔡以臺等二百四十二人進士及第出身有差丁未崔集占叛副都統阿敏死之六月辛酉朔以胡寶琮爲河南巡撫阿思哈署江西巡撫壬戌免甘肅及河南夏邑等四縣明年額賦癸亥以愛必達爲雲貴總督調陳宏謀爲江蘇巡撫明德爲陝西巡撫定長爲山西巡撫甲子賑河南鄆陵等州縣水災戊辰彭家屏論斬丁丑賞達什達瓦部落兩月口糧癸未喀爾喀達瑪琳叛命桑寨多爾濟討之己丑賑安徽宿州等十六州縣衛水災甘肅碾伯等三十八州縣廳水雹災秋七月辛卯朔賑山東館陶等州縣水災壬辰以劉藻爲雲南巡撫癸卯賜彭家屏自盡命史貽直仍兼工部乙巳賑安徽宿州等十州縣水災雹災丙午賑山東東平州等五州縣水災以獲巴雅爾授富德內大臣封貝勒羅布藏多爾濟爲郡王丁未以楊應琚爲閩浙總督以鶴年爲兩廣總督蔣洲爲山東巡撫塔永甯爲山西巡撫哈薩克汗阿布賚遣使入貢戊申上奉皇太后巡幸木蘭癸丑額魯特台吉渾齊等殺札那噶爾布以其首來降戊午賑山東濟甯等三十二州縣衛水災福建龍巖等

二州縣水災八月丙寅哈薩克霍集伯爾根等降丁卯以薩喇善爲吉林將軍
傅森署之戊辰賑甘肅柳溝等三衛旱災乙亥上奉皇太后巡幸木蘭行圍賑
山西汾陽水災辛巳巴雅爾達什車凌伏誅九月癸巳克埒特烏魯特各部俱
平甲午上御行殿哈薩克阿布賚等使臣入覲賜宴戊戌以富勒渾爲湖南巡
撫琿齊等復叛庚子額魯特沙喇斯瑪呼斯二宰桑叛命都統滿福討之以雅
爾哈善爲兵部尙書辛丑上奉皇太后回駐避暑山莊壬寅磔尼瑪等於故將
軍和起墓前丁未命劉統勳赴山東江南辦理河工辛亥上奉皇太后還京師
冬十月壬戌上幸南苑行圍癸亥琉球入貢乙丑以雅爾哈善署定邊右副將
軍丁卯召車布登扎布來京以納木扎勒署定邊右副將軍阿桂赴科布多以
莽古賚爲北路參贊大臣辛未以兆惠爲定邊將軍車布登扎布爲定邊右副
將軍丙戌以永貴爲陝西巡撫十一月丙申以喀爾喀親王德沁扎布爲北路
參贊大臣壬子以吳拜爲左都御史戊午賑甘肅臯蘭等二十二廳州縣霜雹
等災十二月癸亥以陳宏謀爲兩廣總督李侍堯署之託恩多爲江蘇巡撫阿

爾泰爲山東巡撫己巳大學士陳世倌乞休許之乙亥封車木楚克扎布爲郡王丁丑賑扎魯特阿魯科爾沁三旗災庚辰舒赫德以失機褫職甲申加史貽直陳世倌太子太傅鄂彌達劉統勳太子太保是歲朝鮮暹羅琉球入貢

二十三年春正月己丑賑河南衛輝等府屬災民一月免甘肅乾隆十六年至二十二年逋賦庚寅命兆惠車布登扎布勦沙喇伯勒雅爾哈善額敏和卓征回部辛卯賑江蘇清河等十八州縣安徽宿州等十州縣災民有差癸酉賑直隸大名等州縣災民丙午以俄羅斯呈驗阿睦爾撒納屍及哈薩克稱臣納貢宣諭中外己酉吏部尙書汪由敦卒上親臨賜奠壬子以劉統勳爲吏部尙書調秦惠田爲刑部尙書以嵇璜爲工部尙書調鍾音爲廣東巡撫周琬爲福建巡撫周人駿署貴州巡撫癸丑命雅爾哈善爲靖逆將軍額敏和卓哈當阿爲參贊大臣順德訥愛隆阿玉素布爲領隊大臣征回部命永貴定長以欽差大臣關防辦理屯田事務二月庚申朝鮮入貢癸亥賑陝西葭州等八州縣旱災乙丑賑德州等三十七州縣衛所災民三月庚寅上謁西陵癸巳上謁昭西陵

孝陵孝東陵景陵庚子上謁秦陵辛丑兆惠等進兵沙喇伯勒獲扎喇沁哈拉拜盡殲其衆舍楞遁命和碩齊唐喀祿追捕之王寅免江蘇山陽等二十五州縣衛額賦有差乙巳御試翰林詹事等官擢王鳴盛等三員爲一等餘陞黜有差試由部院改入翰林等官擢德爾泰爲一等餘陞黜有差丁未以吳士功爲福建巡撫鍾音爲陝西巡撫托恩多爲廣東巡撫莊有恭署江蘇巡撫馮鈴爲湖北巡撫夏四月壬戌免甘肅蘭州等六府州縣乾隆三年至十年逋賦戊辰復封額駙色布騰巴勒珠爾爲親王免直隸霸州等三十三州縣廳乾隆十年至二十年逋賦庚午致仕大學士陳世倌卒壬申命李元亮兼署戶部尙書免直隸魏縣等二十九州縣廳上年水災額賦丙子命陳宏謀回江蘇以總督銜管巡撫事以馮鈴爲湖南巡撫莊有恭署湖北巡撫李侍堯署兩廣總督庚辰上詣黑龍潭祈雨壬午以旱命刑部清理庶獄減徒以下罪直隸如之五月戊子免甘肅通省二十四年額賦癸丑賑陝西延安等三府州旱災六月辛未免陝西榆林等八州縣逋賦癸未免陝西靖邊等八州縣上年額賦直隸元城等

州縣蝗秋七月丁亥免甘肅安西等三廳衛二十二年風災額賦己丑毛城鋪
河決庚寅霍集占援庫車雅爾哈善等擊敗之免福建臺灣縣旱災額賦丙申
加黃廷桂少保楊應琚開泰太子太保楊錫紱太子少師陳宏謀高晉胡寶琮
太子少傅白鍾山愛必達吳達善太子少保戊戌賑山西靜樂等州縣水雹災
庚子上奉皇太后秋獮木蘭壬寅舍楞奔俄羅斯召阿桂還癸卯右翼布魯特
瑪木特呼里比米隆遣其弟舍爾伯克入覲諭縛獻哈薩克錫喇乙巳以納木
札勒爲靖邊將軍三泰爲參贊大臣諭兆惠赴庫車丙午上奉皇太后駐避暑
山莊戊申賞車布登扎布親王品級壬子賑陝西延安等十七州縣旱雹災八
月丙寅雨己巳上奉皇太后木蘭行圍甲戌以都賚爲兵部尙書丁丑賑甘肅
臯蘭等二十四州縣廳旱災壬午緬甸國王莽達喇爲得楞野夷所害木梳鋪
土官整藉牙自立九月己丑賜布魯特使臣舍爾伯克宴提督馬得勝以攻庫
車失機處斬庚寅右部哈薩克圖里拜及塔什干回人圖爾占等來降丙申奉
皇太后駐避暑山莊戊戌調歸宣光爲左都御史以嵇璜爲禮部尙書命梁詩

正署工部尙書命駐防伊犁大臣兼理回部事務己亥賑浙江仁和等縣水災
甲辰哈喇哈勒巴克回部來降庚戌和闐城伯克霍集斯等來降壬子烏什城
降冬十月癸亥賑浙江錢塘等十六縣場水災山西朔平府屬霜災丁卯賑直
隸大城等九縣水雹霜災兆惠自巴爾楚克進兵葉爾羌甲戌吳拜病免以德
敏爲左都御史賑直隸滄州等六州縣場水災十一月甲申朔右部哈薩克遣
使來朝賜宴乙酉上回蹕丙戌上幸南苑行圍戊子上大閱己丑以阿里衮爲
參贊大臣赴兆惠軍營辛卯賑江蘇海州等五州縣水旱潮災丁酉兆惠至葉
爾羌城外陷賊圍中授富德爲定邊右副將軍阿里衮愛隆阿福祿舒赫德爲
參贊大臣往葉爾羌策應己亥以十二月朔望日月並蝕諭修省辛丑克里雅
伯克阿里木沙來降甲辰以兆惠深入鏖戰封一等武毅謀勇公晉額敏和卓
郡王品級霍集斯貝子加貝勒品級丁未訥木札三泰奎瑪岱策應兆惠途次
遇賊死之加贈納木扎勒公爵三泰子爵奎瑪岱世職以舒赫德爲工部尙書
庚戌富德赴葉爾羌十二月癸丑朔日蝕左副都御史孫灝奏請明年停止巡

幸上斥其識見舛繆改用三品京堂並以效法皇祖練武習勞諭中外賑福建台灣等四縣風災加賑浙江仁和等七縣所水災壬戌裘曰修罷軍機處行走丁卯除甘肅張掖等四廳縣水衝田畝額賦戊辰晉封喀爾喀扎薩克郡王齊巴克雅喇木丕勒爲親王壬申免浙江錢塘等七縣本年水災額賦

二十四年春正月甲申免甘肅通省明年額賦及積年各項積欠癸巳雅爾哈善處斬己亥大學士伯黃廷桂卒以吳達善爲陝甘總督明德爲甘肅巡撫暫護總督授李侍堯兩廣總督癸卯命蔣溥爲大學士仍管戶部尙書梁詩正爲兵部尙書歸宜光爲工部尙書陳惠華爲左都御史李元亮兼管兵部滿尙書蘇昌署滿工部尙書二月壬戌哈寧阿論斬癸亥賑車都布等三旗旱災甲子富德阿里袞與霍集占戰呼爾璘大敗之封富德爲三等伯予舒赫德阿里袞豆斌等世職命舒赫德回阿克蘇辦事己巳富德兵至葉爾羌會兆惠兵進攻晉封富德一等伯命車布登扎布爲副將軍福祿車木楚克扎布爲參贊大臣鄂斯滿等陷克里雅諭巴祿援和闐庚辰以兆惠富德回阿克蘇嚴責之三月

癸未命舒赫德同霍集斯駐和闐截賊竄路己丑以頭等侍衛烏勒登副都統齊努渾爲北路參贊大臣壬辰召楊應琚來京以楊廷璋署閩浙總督甲午彗星見己亥明瑞晉封承恩毅勇公江蘇淮安等三府州蝗夏四月辛亥富德等援和闐癸丑以阿桂爲富德軍營參贊大臣丁巳常雩祀天於圓丘上以農田望澤命停止鹵簿步行虔禱以楊應琚爲陝甘總督吳達善以總督銜管巡撫事戊午以楊廷璋爲閩浙總督莊有恭爲浙江巡撫庚申免浙江錢塘等十六縣場上年風災額賦辛酉展賑甘肅河州等處旱災命刑部清獄減刑甘肅亦如之甲子賑甘肅狄道等二十三廳州縣衛旱災雹災丁卯上臨原任大學士黃廷桂喪癸酉免山西陽等五州縣上年水災雹災額賦丁丑禁織造貢精巧絺繻命舒赫德仍回駐阿克蘇五月辛巳免陝西潼關等六十五廳州縣本年額賦有差辛卯上詣黑龍潭祈雨丁酉賑陝西咸寧等州縣旱災己亥詔諸臣修省仍直言得失辛丑上素服詣社稷壇祈雨丁未上以雨澤未沛不乘輦不設鹵簿由景運門步行祭方澤乙酉賑甘肅皋蘭等州縣被旱災民六月庚戌

綏常犯奏請處決甲寅以恆祿爲綏遠城將軍戊午賑陝西榆林等十一州縣旱災庚申上以久旱步至園丘行大雩禮是日大雨命兆惠進兵喀什噶爾富德進兵葉爾羌甲戌江蘇海州等州縣山東蘭山等縣蝗諭裘曰修海明捕蝗丙子英吉利商船赴甯波貿易莊有恭奏卻之諭李侍堯傳集外商示以禁約六月丙戌免福建台灣等三縣上年風災額賦丁酉賑甘肅皋蘭等州縣旱災庚子布拉呢敦棄喀什噶爾遁甲辰霍集占棄葉爾羌遁丙午以劉綸爲左都御史戊申以甘肅旱停發本年巴里等處遣犯秋七月己酉朔兆惠等奏喀什噶爾達爾羌回衆迎降布拉呢敦霍集占遁巴達克山命阿里衮等率兵攻巴爾楚克庚戌諭兆惠等追捕布拉呢敦霍集占命車布登扎布駐伊犁防霍集占等入俄羅斯辛亥以捕蝗不力奪陳宏謀總督銜壬子上奉皇太后敕蹕秋獮木蘭己未上奉皇太后駐蹕避暑山莊停徵山西陽曲等三十九廳州縣旱災額賦丁丑改西安總督爲川陝總督四川總督爲四川巡撫甘肅巡撫爲甘肅總督管巡撫事以開泰爲川陝總督楊應琚爲甘肅總督山西平定等州縣

蝗八月己卯明瑞追勦霍集占等於霍斯庫魯克嶺大敗之壬午賑甘肅皋蘭等四十廳州縣本年旱災己丑申禁英吉利商船逗遛甯波壬辰富德等奏追勦霍集占於阿勒楚爾大敗之癸巳上奉皇太后幸木蘭行圍庚子富德奏兵至葉什勒庫勒諾爾霍集占竄巴達克山九月庚戌賑浙江江山等縣水災論勦賊功晉封回人鄂對爲貝子阿什默特哈岱默特爲公復敏珠爾多爾濟公爵癸丑定西域祀典命阿桂赴阿克蘇辦事晉封玉素布爲貝勒丙寅改甘肅安西鎮爲安西府上奉皇太后還京師以蘇昌爲湖廣總督除回城霍集占等苛斂冬十月己卯頒給阿桂欽差大臣關防癸未賑山西陽曲等五十六廳州縣旱災丁亥賜哈甯阿自盡戊子禁州縣捕蝗派累民間癸巳免山西助馬路莊頭本年旱災額賦十分之七乙未以鄂弼爲山西巡縣賑盛京開原等城承德等七州縣旱災撫恤長蘆滄州等六州縣嚴鎮等五場被水竈戶均蠲額賦有差免甘肅狄道等二十二廳州縣上年水災雹災額賦丙申賑順天直隸固安等四十七州縣廳水霜雹蟲災並蠲額賦有差丁酉諭國家承平百年休養

滋息生齒漸繁今幸邊陲式廓萬有餘里以新闢之土疆佐中原之耕鑿又化
兇頑之敗類爲務本之良民一舉而數善備各督撫其通飭所屬安插巴里坤
各城人犯分別懲治勿以縱釋有罪爲仁使良法不行己亥賑江蘇上元等十
九州縣廳衛水蟲風潮災庚子富德奏巴達克山素勒坦沙獻霍集占首級全
部投誠命宣諭中外將軍兆惠加賞宗室公品級鞍轡將軍富德管封侯爵並
賞戴雙眼花翎參贊大臣公明瑞公阿里袞賞戴雙眼花翎舒赫德以下均從
優議叙晉封額敏和卓爲郡王賞玉素布郡王品級辛丑以平定準回兩部用
兵本末製開惑諭宣示中外賑浙江嘉興等二十州縣衛所雙穗等九場水災
蟲災壬寅却諸王大臣請上尊號賑陝西定邊等九縣旱雹霜災癸卯召喀爾
喀杜爾伯特諸部落汗王公等赴太平嘉宴十一月辛亥以平定回部上率諸
王大臣詣皇太后壽康宮慶賀御太和殿受朝賀頒詔中外覃恩有差辛酉楊
應琚加太子太師乙丑除山東濟甯州魚臺縣水淹地賦癸酉命各回城伯克
等輪班入覲哈爾塔金布魯特來降十二月甲子賑甘肅皋蘭等十四廳州縣

及東樂縣丞屬本年旱災癸巳免兩淮丁溪等七場被災應納折價十分之七
甲午賑山東海豐等十六州縣衛永阜等三場本年水災潮災丁酉免浙江江
山等三縣本年水災額賦

二十五年春正月戊申以西師凱旋再免來歲甘肅額賦己酉賑甘肅皋蘭等
州縣旱災庚戌命烏魯木齊屯田乙卯霍罕額爾德尼伯克遣使陀克塔瑪特
等入覲丙辰巴達克山素勒坦沙遣使額穆爾伯克等及齊哩克博羅爾使入
覲定邊將軍兆惠等以霍集占首級來上並俘酋捫多索丕等至京丁巳上御
午門行獻俘禮命霍集占首級懸示通衢省捫多索丕等罪己未布魯特阿濟
比遣使錫喇噶斯等入覲二月丁丑命侍郎裘曰修伊祿順清查甘肅各州縣
辦理軍需賑札薩克圖汗等四旗部落飢癸未上敕蹕詣東陵乙酉賑山西陽
曲等州縣上年旱災丙戌上謁昭西陵孝陵孝東陵景陵丁亥以清馥遷延諱
匿命正法辛卯免盛京等十九驛旱災額賦並賑之癸巳上還京師丙申命車
布登札布以副將軍統兵勦捕哈薩克巴魯克巴圖魯以瑪琿車木楚克札布

爲參贊大臣上詣泰陵己亥上謁泰陵以兆惠富德爲御前大臣壬寅兆惠等凱旋上至良鄉郊勞癸卯上還京師甲辰賜哈密扎薩克郡王品級貝勒玉素布等冠服有差三月丙午朔上御太和殿受凱旋朝賀丁未試辦伊犁海努克等處屯田設烏魯木齊至羅克倫屯田村莊免安徽懷甯等十七州縣衛上年水蟲災額賦壬子以阿布都拉爲烏什阿奇木伯克阿什默特爲和闐阿奇木伯克噶岱默特爲喀什噶爾阿奇木伯克鄂對爲葉爾羌阿奇木伯克甲寅頒阿桂關防駐伊犁辦事常亮等協同辦事丁巳免浙江仁和等十州縣衛所雙穗等九場上年水災蟲災額賦辛酉賑江蘇上元等五十五州縣衛上年水災甲子上臨和碩和婉公主喪次賜奠丙寅上幸皇六子永瑤第戊辰命新柱往葉爾羌辦事己巳晉封純貴妃爲皇貴妃以巴圖濟爾噶勒爲內大臣庚午免山東海豐等十六州縣永阜等三場上年潮水災額賦夏四月戊子以山東蘭山等縣蝻生命直隸豫防之己亥內大臣薩喇勒卒五月甲辰朔日食詔修省丙午諭陝甘總督轄境止烏魯木齊飭楊應琚仍回內地壬子詔曰內地民人

往蒙古四十八部種植設禁之是厲民今烏魯木齊各處屯政方興客民前往各成聚落汗菜闢而就食多大裨國家牧民本圖無識者又疑勞民特爲宣諭癸丑賜畢沅等一百六十四人進士及第出身有差丁巳免安徽懷甯等十七州縣衛上年水災蟲傷額賦乙丑裁陝西榆葭道改延綏道爲延榆綏道移駐榆林府以鄜州隸督糧道己巳哈薩克阿布勒巴木比特遣使入覲賜勅書卻所請游牧伊犁及居住巴爾魯克等地前掠烏梁海之巴魯克巴圖魯服罪獻還所獲仍錫賚之六月乙亥免甘肅徵本年及來年耗羨丁酉召阿里衮回京命海明赴喀什噶爾辦事秋七月癸卯朔諭熱河捕蝗甲辰山西寧遠等廳直隸廣昌等州縣蝗甲寅伯什克勒木等莊回人遇喇木呢雅斯叛阿里衮勦平之以阿思哈爲江西巡撫乙卯賑江蘇高郵等州縣水災戊辰以楊寧爲喀什噶爾提督己巳以俄羅斯駐兵和寧嶺喀屯河額爾齊斯阿勒坦諾爾四路聲言分界諭阿桂車布登札布等來歲以兵逐之八月丙戌命烏魯木齊駐劄大臣安泰定長永德爲總辦列名奏事其大臣侍衛等均如領隊大臣例專任一

事咨安泰等轉奏己丑上奉皇太后秋彌木蘭壬辰以阿桂總理伊犁事務授爲都統丙申上奉皇太后駐避暑山莊戊戌上奉皇太后幸木蘭行圍己亥增設江蘇江甯布政使駐江甯府分轄江淮揚徐通海六府州以蘇州布政使分轄蘇松常鎮太五府州安徽布政使回駐安慶命託庸調補江甯布政使命戶部侍郎于敏中在軍機處行走九月乙卯喀爾喀車臣汗札薩克旺沁扎布以不能約束屬人革札薩克降貝子爲鎮國公丙辰恒春引見以舒明署綏遠城將軍丁巳三姓副都統巴岱以挖獲人衆滋事不能捕治反給牌票上以畏懦責之命正法庚申命德爾格駐闕展辦事癸亥哈薩克汗阿布賚使都勒特克埒入覲冬十月壬申朔上奉皇太后回駐避暑山莊乙亥以蘇州布政使蘇崇阿刑求書吏妄奏侵蝕七十餘萬劉統勳等鞠治皆虛革發伊犁戊寅以恒祿爲吉林將軍如松爲綏遠城將軍乙酉賑安徽宿州等十三州縣衛本年水災辛卯上奉皇太后還京師以阿里衮爲領侍衛內大臣癸己免直隸宣化等七州縣本年水雹災額賦己亥賑湖南常寧等十二州縣衛旱災十一月癸卯免

江蘇山陽等二十五州縣衛本年水災額賦有差丁未除山東水利等二場並海豐縣潮衝竈地額賦庚申賑甘肅洮州等二十七廳州縣衛本年水災丙寅以常鈞署江西巡撫庚午允墾肅州隣邊荒地開渠溉田十二月丙戌西安將軍松阿哩以受屬員餽遺褫職論絞命甘肅總督仍改爲陝甘總督以伊犁葉爾羌等處均駐大臣無須更置道員歸總督轄停四川總督兼管陝西調胡寶琮爲江西巡撫吳達善爲河南巡撫以明德爲甘肅巡撫丁亥大學士蔣溥以病乞休溫諭慰留壬辰上幸瀛臺賜入覲葉爾羌諸城伯克薩里等食至重華宮賜茶果壬辰阿思哈論絞丙申德敏遷荊州將軍以永貴爲左都御史命赴喀什噶爾辦事代舒赫德回京是年朝鮮南掌入貢

二十六年春正月壬寅紫光閣落成賜畫像功臣並文武大臣蒙古王公等宴賑湖南零陵等七州縣江蘇清河等六州縣水災丙午以愛必達劉藻兩年所出屬員考語相同下部嚴議浙江提督馬龍圖以挪用公項解任勒治甲寅尹繼善陞見高晉護兩江總督調海明赴阿克蘇同辦事命舒赫德赴喀什噶爾

辦事永貴赴葉爾羌辦事癸亥以傅森署左都御史癸酉上臨大學士蔣溥第視疾鄂寶以迴護陸川縣縱賊一案下部嚴議以託庸爲廣西巡撫永泰署湖南巡撫庚辰上奉皇太后西巡五台壬午免所過州縣額賦十分之三甲申上奉皇太后謁秦陵乙酉安南國王黎維禕卒封其姪黎維禕爲安南國王丁亥免直隸宣化萬全等八州縣乾隆八年至十八年逋賦癸巳上奉皇太后駐臺麓寺己亥免山東濟甯等三州縣上年水災額賦貸甘肅淵泉等三縣農民豌豆籽種令試種三月庚子希布察克布魯特額穆爾比自安集延來歸遣使入覲乙巳上幸正定府閱兵戊申江南河道總督白鍾山卒以高晉代之調託庸爲安徽巡撫以熊學鵬爲廣西巡撫己酉設喀什噶爾駐劄辦事大臣命伊勒圖協同永貴辦事庚戌賑安徽宿州等十三州縣衛水災壬子上幸平陽淀行圍乙卯免直隸宣化等二縣上年雹災額賦丁卯授阿桂內大臣改綏遠城建威將軍曰綏遠城將軍己巳南掌國王蘇嗎喇薩提拉准第駕公滿遣使表賀皇太后聖壽皇上萬壽並貢方物夏四月庚午上臨莊親王第大學士蔣溥第

視疾辛未莊有恭奏劾參將安廷召不以保舉在前姑容於後諭嘉之己卯大學士蔣溥卒命旌額理阿思哈赴烏魯木齊辦事達桑阿赴阿克蘇辦事代安泰定長納世通回京戊子免湖南常甯等十二州縣上年旱災額賦有差庚寅上閱健銳營兵壬辰以李侍堯爲戶部尙書調蘇昌爲兩廣總督愛必達爲湖廣總督以吳達善爲雲貴總督常鈞爲河南巡撫癸巳命劉藻暫署雲貴總督甲午賜王杰等二百一十七人進士及第出身有差五月丁未以劉統勳爲東閣大學士兼管禮部事梁詩正爲吏部尙書協辦大學士劉綸爲兵部尙書金德瑛爲左都御史戊午以定長爲福建巡撫楊廷璋兼署之六月癸未賑雲南新興等二州縣地震災壬辰免江蘇句容等十八州縣衛圯地額賦秋七月辛丑協辦大學士鄂彌達卒命兆惠協辦大學士調舒赫德爲刑部尙書兆惠署以阿桂爲工部尙書阿里袞署癸丑上啓蹕秋獮木蘭命誠親王允祿扈皇太后駕壬戌上駐避暑山莊以皇太后巡幸木蘭直隸沿途地方文武玩忽規避飭下部嚴議丙寅河南祥符等州縣河溢八月丁丑賑湖北漢川等十三州縣

衛水災戊寅以湯聘爲湖北巡撫胡寶琛爲河南巡撫常鈞爲江西巡撫庚辰命高晉赴河南協辦河工辛卯上奉皇太后幸木蘭壬辰薩嚨爾巴噶什兩部伯克之兄子孟克及雅爾木古齊入覲九月丁酉停今年勾決辛丑命明瑞赴伊犁辦事代阿桂回京癸卯山東曹縣二十堡黃河及運河各漫口均合龍丙午賑湖南武陵等州縣水災戊申河南懷慶府丹沁二河溢入城衝沒人口千三百有奇賑被災人民壬子賑湖北沔陽等十一州縣衛水災乙卯以寶光鼎于會謙大典紛囟謾置下部嚴議己未命素誠赴烏什辦事代永慶回京以札拉豐阿爲烏里雅蘇臺參贊大臣雅郎阿赴科布多辦事代札隆阿福祿回京庚申命傅景赴西藏辦事代集福回京乙丑賑山東齊河等四十五州縣水災河南祥符等五十四州縣本年水災冬十月戊辰除甘肅皋蘭等三十二廳州縣水衝田畝額賦並免山丹等五縣水衝撥運糧米辛未上奉皇太后還京師壬辰召裘曰修回京賑江蘇銅山等縣水災周人驥奏仁懷等處試織繭紬各屬仿行上嘉之十一月乙未朔賑順直固安等六十九州縣本年水災丁酉以

英廉爲總管內務府大臣己亥河南楊橋漫口合龍辛丑調嵩椿爲察哈爾都統以舒明爲綏遠城將軍癸卯免山西陽曲等三十八州縣大同管糧等十四廳二十四年水災隨征耗銀丁未免河南祥符等四十三州縣漕糧漕項有差辛亥減江蘇山陽等二十一州縣衛水沈地畝並除民屯學田湖蕩草灘額賦癸丑禮部尙書五齡安以讀表錯誤褫職甲寅上奉皇太后御慈甯宮加上徽號曰崇慶慈宣康惠敦和裕壽純禧恭懿皇太后翌日頒詔覃恩有差以永貴爲禮部尙書阿里袞署之內辰上奉皇太后御慈甯宮率王大臣行慶賀禮進製聖母七旬萬壽連珠奉皇太后懿旨停止進獻以勒爾森爲左都御史十二月丁卯以雲南江川等二州縣地震成災命加倍賑之仍免本年額賦辛未免江蘇南匯等六州縣二十三年水旱災額賦甲戌賑山西文水等十三州縣水災甲申賑湖北漢川等二縣衛水災

二十七年春正月丙申以奉皇太后巡省江浙詔免江蘇安徽浙江逋賦賑河南祥符等州縣災民有差丁酉以科爾沁敏珠爾多爾濟旗災貸倉穀濟之丙

午上奉皇太后南巡發京師免直隸山東經過地方本年錢糧十分之三上年被災處十分之五戊申左都御史金德瑛卒以董邦達代之賑順直文安等二十八州縣上年水災甲寅賑山東曹齊河等二縣水災有差召多爾濟回京命容保駐西甯辦事丁巳綏遠城將軍舒明卒調蘊著代之戊午免山東惠民等十五州縣衛歷年民欠穀銀己未以周人驥因執開南明河荒農累民罷之命喬光烈爲貴州巡撫癸亥命清查俄羅斯疆界二月己巳賑江蘇高郵等十一州縣安徽太和等五州縣水災庚午命尹繼善爲御前大臣壬申上奉皇太后渡河閱清口東壩惠濟閘命阿里袞爲御前大臣高晉爲內大臣丙子朝鮮入貢丁丑哈薩克使策伯克等入覲行在賜冠服有差庚辰上奉皇太后渡江閱京口兵辛巳上幸焦山乙酉上奉皇太后臨幸蘇州府丙戌免河南祥符等四十三州縣上年水災額賦戊子上謁文廟三月甲午朔上奉皇太后臨幸杭州府乙未上幸海甯閱海塘丁酉賑湖北潛江等九州縣衛水災戊戌上閱兵庚子免江浙節年未完地丁屯餉漕項並水鄉蠲課銀辛丑賑山東齊河等五州

縣上年水災壬寅上幸觀潮樓賜浙江召試貢生沈初等二人舉人與進士孫士毅等二人並授內閣中書癸卯上奉皇太后臨視織造機房丙午回蹕丁未加錢陳羣刑部尙書銜甲寅上奉皇太后渡江乙卯命濬築直隸各河隄以工代賑丙辰移山西歸綏道駐紱遠城己未上祭明太祖陵閱兵幸兩江總督尹繼善署庚申免江蘇江甯蘇州杭州附郭諸縣本年額賦辛酉賜江南召試諸生程晉芳等五人舉人與進士吳泰來等三人並授內閣中書壬戌上奉皇太后渡江夏四月庚午上閱高家堰諭濟運壩至運口接建磚工上奉皇太后渡河以大理寺少卿顧汝修奉使安南擅移書詰責國王褫職癸酉命莊親王允祿等由水程奉皇太后回蹕上登陸由徐州閱河甲戌免浙江仁和等十縣湖州一所仁和等五場上年水災額賦庚辰上祭孟子廟謁先師廟辛巳上謁孔林賑甘肅安定等十州縣上年雹災壬午免山東齊河等四十四州縣衛所上年水災額賦戊子皇太后登陸駐蹕德州行宮己丑上送皇太后登舟庚寅命劉統勳會勘景州疏築事宜辛卯免順直大興等十州縣廳通賦五月甲午以

乾清門行走額魯特鄂爾奇達遜奮勉勇往賞三等伯爵賑安徽壽州等十州縣衛上年水災乙未上至涿州哈薩克陪臣阿塔海等入覲賜冠服有差賑長蘆屬滄州等七州縣及嚴鎮等七場上年水災竈戶並免賦有差辛丑上詣黃新莊迎皇太后居暢春園賑湖南武陵等四州縣上年水災並免額賦有差癸卯除安徽虹縣等四州縣衛水占窪地額賦戊申調鄂弼爲陝西巡撫以扎拉豐阿爲正白旗領侍衛內大臣癸丑以倭和爲總管內務府大臣閏五月癸亥朔以清保年老召來京調格舍圖爲盛京將軍朝銓署之丁卯免湖北潛江等九州縣衛上年水災額賦辛巳籍沒納延泰財產辛卯命西安將軍如松襲封信郡王以德昭之子修齡襲如松公爵改察哈爾都統嵩椿爲西安將軍以巴爾品代之六月丁酉免直隸固安七十四州縣廳上年水災額賦壬寅召此次南巡接駕休致之編修沈齊禮來京及因事降革之馮鎬等十三員引見乙巳以庫爾勒伯克等進貢諭計直頒賞仍通諭各城非盛典進方物者皆止之己酉以原任將軍班第參贊大臣鄂容安在伊犁竭忠全節命於伊犁關帝廟後

設位致祭秋七月壬戌以朝鮮三水府滋事逃人越境命恆祿等赴邊境查勘
癸亥免安徽壽州等十六州縣衛上年水災額賦戊辰上奉皇太后巡幸木蘭
免經過地方本年錢糧十分之五乙亥霍罕侵據額德格訥阿濟畢布魯特之
鄂斯等處諭永慶撥霍罕還之八月庚子建伊犁之固勒札烏哈爾里克兩城
賜名綏定安遠上奉皇太后回駐避暑山莊甲辰託恩多丁憂調明山署廣東
巡撫蘇昌兼署湯聘爲江西巡撫以宋邦綏爲湖北巡撫愛必達兼署壬子免
順直文安等十七州縣廳廨賦及甯河等五縣本年水災額賦丙辰賜察哈爾
郡統敕書黑龍江將軍綽勒多卒調國多歡代之九月癸亥賞自哈薩克來投
之塔爾巴哈沁額魯巴桑銀綺庚午上奉皇太后回蹕辛未巴達克山素勒坦
沙遣使入覲丁丑命乾清門侍衛明仁帶御醫馳視胡寶琨疾賑山東齊河等
三十五州縣衛水災并免額賦甲申建烏魯木齊城堡賜城名曰寧邊輯懷堡
名曰宣仁懷義樂全寶昌惠祿慶豐戊子理藩院尙書領侍衛內大臣富德以
索取蒙古王公馬畜褫職逮問己丑以新柱爲理藩院尙書明瑞爲正白旗領

侍衛內大臣冬十月辛卯調陳宏謀爲湖南巡撫宋邦綏署之莊有恭爲江蘇巡撫熊學鵬爲浙江巡撫馮銓爲廣西巡撫顧濟美護之癸巳緬甸宮裏雁以焚殺孟連土司刀派春全家命處斬傳首示衆癸卯以愛烏罕汗哈默特沙遣使人貢諭沿途督撫預備筵宴并命額勒登額護送乙巳設總管伊犁等處將軍以明瑞爲之命築科布多城己酉賑順直朔州縣等六十三州縣廳水雹霜災免江蘇清河等十七州縣衛本年水災額賦甲寅賑浙江仁和等二十八州縣衛場水災丁巳奉天府府尹通福壽以徇縱治中高錦勒索商人解任鞠治十一月己未朔濬山東德州運河庚申設伊犁參贊大臣以愛隆阿伊勒圖爲之辛酉設伊犁領隊大臣命明瑞等率兵驅逐塔爾巴哈台山陰之哈喇巴哈等處越牧哈薩克戊辰以薩魯布魯特頭目沙巴圖交還所掠霍罕貿易人等馬匹諭永貴等酌賞之呼叶齊布魯特爲霍罕所侵來投命移於阿拉圖呼勒等處游牧庚午命博斯和勒爲杜爾伯特盟長設副將軍二員以車凌烏巴什爲右翼副將軍巴桑爲左翼副將軍辛未建喀什噶爾新城壬申改山西平魯

營參將爲都司裁原設中軍守備及井坪營都司丙子哈薩克努爾資烏爾根齊城哈雅克等遣使入覲甲申諭方觀承仿河南洛道路溝洫賑甘肅旱閏等二十廳州縣本年冰雹霜雪災戊子洛山東壽張等州縣河道溝渠十二月庚寅大學士史貽直以老病乞休優詔慰畱命不必兼攝工部以示體恤丙申克什密爾呢斯雅伯克請入覲允之霍罕呈書以布魯特鄂斯故地爲已有諭永貴等嚴檄令給還辛丑以霍罕伯克復永貴等書謂前遣使人奉旨稱爲汗欲以喀什噶爾爲界諭嚴檄斥駁之丁未工部尙書歸宣光卒以董邦達代之壬子命納世通赴喀什噶爾辦事代永貴回京癸丑巴達克山侵圍博羅爾諭新柱等嚴檄責令息兵並索獻布拉尼敦妻孥

二十八年春正月庚申賑順直屬之霸州等三十五州縣山東齊河等二十州縣衛水災有差甲子上御紫光閣賜愛烏罕巴達克山霍罕哈薩克各部使人宴丁卯上大閱暢春園之西廠命各部使人從觀以法起爲歸化城都統壬申命阿桂在軍機處行走壬午河南巡撫胡寶琮卒以葉存仁爲河南巡撫甲申

以納世通爲參贊大臣駐喀什噶爾總理回疆事務壬辰命方觀承赴河南會勘漳河工程戊戌改西安滿洲漢軍副都統爲左右翼副都統壬寅裁西甯辦事大臣庚戌上謁昭陵孝陵孝東陵景陵是日回蹕改烏魯木齊副將爲總兵乙卯命侍郎裘曰修督辦直隸水利三月己未上還京師壬戌免山東齊河等三十一州縣衛水災額賦丁卯上謁泰陵是日回蹕賞甯津縣百有三歲壽民李友益及其子姪孫銀牌緞疋有差丁丑設伊犁額魯特總管三員副總管以下員額有差戊寅命福德赴庫倫同桑齊多爾濟辦事丙戌免江蘇清河等十四州縣衛水災額賦夏四月壬辰賑浙江錢塘等十七州縣場上年水災癸卯上詣黑龍潭祈雨乙巳雨戊申法起以賊免以傅良爲歸化城都統壬子賜秦大成等一百八十八人進士及第出身有差甲寅裁歸化城都統五月辛酉圓明園火癸亥命尙書阿桂往直隸霸州等處會同侍郎裘曰修總督方觀承督辦疏濬事以舒赫德署工部尙書甲子封朝鮮國王孫李算爲世孫己巳果親王弘瞻以干與朝政削王爵仍賞給貝勒和親王弘晝以儀節僭妄削俸三年

庚午大學士史貽直卒壬申上試翰林詹事等官擢王文治等三員爲一等餘
各陞黜有差甲戌上奉皇太后秋獵木蘭以李侍堯爲湖廣總督輔德爲湖北
巡撫陳宏謀兼署之調劉綸爲戶部尙書仍兼署兵部以陳宏謀爲兵部尙書
調喬光烈爲湖南巡撫來朝著之乙亥以崔應階爲貴州巡撫己卯調明德爲
江西巡撫以和其衷爲山西巡撫丙戌命福德往庫倫辦事仍帶署理藩院侍
郎銜以額爾景額爲參贊大臣往葉爾羌辦事六月庚寅山東歷城等州縣蝗
壬辰賑甘肅狄道等三十廳州縣水旱霜雹災戊戌開泰以惟怯規避免以鄂
弼爲四川總督明山爲陝西巡撫阿里袞署之阿思哈爲廣東巡撫蘇昌兼署
命阿思哈先署廣西巡撫壬寅四川總督鄂弼卒以阿爾泰爲四川總督崔應
階爲山東巡撫圖勒炳阿爲貴州巡撫吳達善兼署雲南巡撫以梁詩正爲東
閣大學士劉綸協辦大學士調陳宏謀爲吏部尙書彭啓豐爲兵部尙書張泰
開爲左都御史甲辰上幸簡親王第視疾壬子簡親王奇通阿卒秋七月庚申
英廉丁憂命舒赫德兼署戶部尙書劉綸留部治事戊辰仍設西甯辦事大臣

以七十五爲之己巳順直大城滄州等州縣蝗庚辰履親王允禔卒八月癸巳賜烏魯木齊城名曰迪化特納格爾城名曰阜康辛丑上奉皇太后幸木蘭行圍九月乙卯朔日食乙丑上奉皇太后迴駐避暑山莊庚午上奉皇太后回蹕癸酉改甘肅臨洮道爲驛傳道兼巡蘭州府洮岷道爲分巡鞏秦階道丙子上奉皇太后還京師冬十月甲申加梁詩正高晉太子太傅兆惠劉綸阿里衮舒赫德秦蕙田阿桂陳宏謀楊錫紱楊廷璋李侍堯蘇昌阿爾泰太子太保莊有恭劉藻太子少保丙戌上臨奠履親王允禔丁未免江蘇銅山等九州縣水災額賦十一月甲寅朔召成袞扎布來京以扎拉豐阿署烏里雅蘇臺將軍雅郎阿留科布多辛酉河東河道總督張師載卒以葉存仁代之調阿思哈爲河南巡撫明山爲廣東巡撫明德爲陝西巡撫輔德爲江西巡撫常鈞爲湖北巡撫以楊應琚兼署甘肅巡撫丁卯大學士梁詩正卒己卯以楊廷璋爲體仁閣大學士仍留閩浙總督任十二月乙酉免直隸延慶等十州縣雹旱災額賦丁亥賑甘肅皋蘭等十二廳縣旱災飢民辛卯賑山東濟甯等八州縣衡水災乙未

召多歡來京調富僧阿爲黑龍江將軍庚子休致左都御史梅穀成卒丁未命綽克托赴烏魯木齊辦事代額旌里回京

二十九年春正月癸丑朔賑山東濟甯等七州縣衛甘肅永昌等二十四廳州縣災民甲戌加賑雲南江川等五州縣地震災民並免額賦己卯朝鮮入貢二月丁亥命阿敏爾圖駐藏辦事代福鼎回京甲午上謁泰陵乙未命觀音保赴伊犁代愛隆阿回京己亥上還京師己酉免上年直隸蔚州雹災萬全縣旱災額賦辛亥免湖北沔陽等三州縣衛上年水災額賦三月癸丑太子太傅大學士來保卒乙卯移陝甘總督駐蘭州兼管甘肅巡撫事裁甘肅巡撫移固原提督回駐西安改河州鎮總兵爲固原鎮總兵免山東濟甯等七州縣衛上年水災額賦庚申上臨故大學士來保第賜奠免江蘇銅山等二十八州縣衛上年水災額賦壬戌命兆惠署工部尙書阿桂赴西甯會同七十五及章嘉呼圖克圖選派郭羅克頭目夏四月甲午賑甘肅金縣等縣旱災五月壬子朔諭粵海關官員毋進珍珠等物辛酉以託恩多署兵部尙書六月癸未賑湖南武岡等

州縣水災甲申命王桂赴北路代扎拉豐阿回京丁亥河東河道總督葉存仁卒以李宏代之庚寅奉天甯遠等州縣蝗丁酉賑廣東英德等縣水災甲辰調蘇昌爲閩浙總督李侍堯爲兩廣總督明山署之調吳達善爲湖廣總督以劉藻爲雲貴總督乙巳調常鈞爲雲南巡撫以王檢爲湖北巡撫丁未命阿爾泰回四川總督秋七月辛亥朔以楊應琚爲大學士留陝甘總督任陳宏謀協辦大學士壬子命常鈞暫兼署湖廣總督劉藻兼署雲南巡撫甲子湖北黃梅等州縣江溢命撫卹災民丙寅湖南湘陰等州縣湖水溢命賑恤災民丁卯上奉皇太后秋獮木蘭癸酉上奉皇太后駐蹕避暑山莊丁丑賑安徽當塗等州縣水災八月辛巳免甘肅臬蘭等三十二州縣廳本年旱災額賦壬辰諭阿爾泰等曉諭綽斯甲布九土司會攻金川戊戌上奉皇太后巡幸木蘭行圍秦慈田以病解任以劉綸兼署禮部尙書庚子增伊犂雅爾等處領隊大臣各二員以綽克托爲塔爾巴哈台參贊大臣命伍彌泰等仍留烏魯木齊辦事九月己未命刑部侍郎阿永阿會同吳達善識湖南新甯縣民傳帖罷市獄癸亥賑江西

南昌等八縣水災並免額賦丙寅刑部尙書秦慈田卒以莊有恭代之暫留江蘇巡撫任己巳上奉皇太后回駐避暑山莊冬十月癸巳喬光烈以新甯罷市獄褫職調圖勒炳阿爲湖南巡撫以方世儒爲貴州巡撫內申以托恩多爲理藩院尙書辛丑山東進牡丹壬寅賑江蘇上元等六州縣災民癸卯召鍾音回京調富明安赴葉爾羌辦事甲辰賑安徽懷甯等十九州縣衛水災十一月壬子賑甘肅皋蘭等二十廳州縣旱災癸丑築呼圖壁城成賜名曰景化丙辰免湖南武岡等二州縣水災額賦賑甘肅皋蘭等十五廳州縣水雹災乙丑協辦大學士戶部尙書兆惠卒上臨奠丁卯以阿里衮爲戶部尙書協辦大學士調託恩多爲兵部尙書以五吉爲理藩院尙書兆德爲正黃旗領侍衛內大臣十二月戊寅朔以常復爲烏里雅蘇臺參贊大臣戊子賑湖北黃梅等州縣水災甲子禮部尙書陳惠華病免調董邦達代之以楊廷璋爲工部尙書

三十年春正月戊申以皇太后四巡江浙免江蘇安徽浙江歷年因災未完丁漕賑甘肅皋蘭等二十九廳州縣旱災湖北監利等四縣水災有差癸丑劉綸

丁憂命莊有恭以刑部尙書協辦大學士以于敏中爲戶部尙書調明德爲江蘇巡撫和其衷爲陝西巡撫以彭寶爲山西巡撫文綬護之癸亥免直隸山東經過州縣額賦十分之三庚午免山東濟南等六府屬未完因災緩征丁銀二月戊子上奉皇太后渡河閱清口東壩木龍惠濟閘命阿桂赴伊犁辦事壬辰免江蘇州縣乾隆二十八年以前熟田地丁雜款舊欠并經過州縣本年額賦之半己亥朝鮮入貢閏二月丙午朔上奉皇太后臨幸蘇州府上謁文廟己酉免江南蘇州杭州附郭諸縣本年丁銀免浙江經過州縣本年額賦之半辛亥止達改葉爾羌辦事命索琳赴庫倫辦事以額爾景額爲喀什噶爾參贊大臣壬子上奉皇太后臨幸杭州府乙卯烏什回人作亂戕辦事大臣素誠丁巳加沈德潛錢陳羣太子太傅命明瑞進勦烏什庚申命明瑞額爾景額總理烏什軍務明瑞節制各軍命阿桂明亮赴伊犁辦事辛酉舒赫德留京辦事以託恩多署工部尙書戊辰調明山爲江西巡撫王檢爲廣東巡撫李侍堯兼署以李因培爲湖北巡撫己巳賜伊犁新築駐防城名曰惠遠喀什回城曰懷順乙亥

免江蘇上元等五縣上年水旱災額賦三月丙子朔賑湖北漢陽等七州縣上年水災上幸焦山戊寅上奉皇太后駐江甯府壬午上詣明太祖陵奠酒幸尹繼善署觀音保勦烏什逆回失利甲申以馮鈐爲湖南巡撫宋邦綏爲廣西巡撫丙戌上奉皇太后渡江丁亥果郡王弘瞻卒甲午以京察予大學士傅恆等敘乙未上閱高家堰堤奉皇太后渡河召尹繼善入閣辦事以高晉爲兩江總督調李宏爲江南河道總督以李清時爲河東河道總督壬寅追論素誠貪淫激變罪籍產戍其子於伊犁以訥世通卡塔海諱匿敗狀籍產治罪命永貴赴喀什噶爾辦事以託恩多署禮部尙書癸卯上渡河夏四月丙午朔賑甘肅河州等三十六廳州縣上年雹水旱霜災庚戌免湖北漢陽等十二州縣衛上年水災額賦辛亥追予故刑部尙書王士禎諡文簡丁巳上奉皇太后駐德州庚申裁江蘇淮徐海道丙寅上還京師庚午上遶皇太后居暢春園辛未哈薩克使臣鄂托爾濟等入覲五月乙亥嘗封喀爾喀郡王羅布臧多濟爲親王乙酉上臨果郡王弘瞻殯所及簡勤親王奇通阿園寢賜奠以和剛辦事大臣和誠

婪索回人奪職逮問命伊勒圖赴塔爾巴哈台辦事辛卯京師地震丁酉免安徽懷甯等十九州縣衛上年水災額賦甲辰納世通卡塔海貽誤軍務正法六月己酉以楊廷璋署兩廣總督明山暫署董邦達署工部尙書乙卯晉封令貴妃魏氏爲皇貴妃己巳諭明瑞勿受烏什逆回降秋七月辛巳上奉皇太后秋獮木蘭戊子以官保爲左都御史乙未前和闐辦事大臣和誠以貪婪鞫實正法丁酉尊喀爾喀親王桑齋多爾濟爵八月甲辰朔減朝審秋審緩決三次以上刑己未上幸木蘭行圍庚申賑甘肅靖遠等十一廳縣旱災甲子甘肅甯遠等州縣地震命賑恤並免本年額賦九月丙子賑山東章邱等二十一州縣水災戊寅命尹繼善管兵部劉統勳管刑部烏什叛回以城降乙酉以高恒爲總管內務府大臣辛卯以明瑞等未將烏什叛人殄誅送往伊犁下部嚴議辛丑以李侍堯署工部尙書冬十月己酉明瑞阿桂以辦烏什事務錯繆褫職留任賑長蘆屬滄州等三場水災己巳楊應琚陛見命和其衷署陝甘總督湯聘署陝西巡撫十一月癸酉免江蘇海州等六州縣本年旱災額賦乙酉以吏部尙

書傳森年老授內大臣調托恩多代之以托庸爲兵部尙書調馮齡爲安徽巡撫庚寅丑達以扶同桑濟多爾濟私與俄羅斯貿易正法明瑞等以盡誅烏什附逆回衆奏聞辛卯賑山東章邱等十八州縣水災甘肅狄道等十二州縣雹霜災甲午以阿桂爲塔爾巴哈台參贊大臣代安泰回京丁未解阿桂工部尙書以蘊著代之以嵩椿爲綏遠城將軍戊申賑甘肅靖遠等十一廳縣旱災并免額賦乙卯賑山東齊河等十五州縣水災丁卯命托恩多兼署兵部尙書壬辰封皇五子永琪爲榮親王十二月戊午以陝西涇陽縣貢生張璘七世同居賜御製詩章緞匹

清史稿

本紀十三

高宗本紀四

三十一年春正月壬申朔詔以御宇三十年函夏謚甯寰字式闕自本年始普免各省漕糧一次甲戌免甘肅靖遠等十四廳州縣陝西延安等三府州屬積年逋賦丙戌雲南官軍勦莽匪于猛住失利調楊應琚爲雲貴總督吳達善爲陝甘總督以和其衷護之調劉藻爲湖廣總督湯聘署陝西巡撫癸巳刑部尙書莊有恭以諡段成功劾案不實褫職下獄籍產調李侍堯爲刑部尙書以張泰開爲禮部尙書范時綬爲左都御史二月壬寅劉藻降湖北巡撫仍與雲南提督達啟下部嚴議以定長爲湖廣總督調李因培爲福建巡撫常鈞爲湖南巡撫湯聘爲雲南巡撫庚戌上謁東陵辛亥和其衷以彌補段成功虧空褫職逮問以舒赫德署陝甘總督命四達赴陝西會彰寶審辦段成功虧空一案調明山爲陝西巡撫以吳紹詩爲江西巡撫庚申上還京師辛酉莊有恭論斬壬戌上謁泰陵癸亥劉藻褫職留滇効力甲子以鄂甯爲湖北巡撫戊辰上還京

師三月丁亥劉藻畏罪自殺己丑楊應琚以復猛籠等土司內附奏聞夏四月辛丑楊應琚奏大猛養頭人內附官軍進取整欠孟良壬寅以莽匪整欠平宣諭中外丙午和其衷諭斬段成功處斬丁未免雲南普藤等十三土司本年額賦及猛籠通賦甲子賜張書勳等二百一十三人進士及第出身有差五月甲戌上詣黑龍潭祈雨戊寅命正一真人視三品秩丙戌上詣黑龍潭祈雨六月丙午楊應琚奏猛勇頭目召齊及猛龍沙頭目叭護猛等內附戊申予故三品銜西洋人郎世寧侍郎銜秋七月丙子上奉皇太后秋獮木蘭己卯以阿里衮于敏中從扈命舒赫德兼署戶部尙書壬午上奉皇太后駐蹕避暑山莊是日皇后崩癸未諭以皇后上年從幸江浙不能恪盡孝道喪儀照皇貴妃例癸巳御史李玉鳴奏皇后喪儀未能如例忤旨戊伊犁丁酉楊應琚奏補哈大頭目噶第牙翁猛撒頭目喇鮪細利內附八月己亥賑湖南湘陰等十三縣衛水災癸丑上幸木蘭行圍宥莊有恭罪起爲福建巡撫甲寅伊犁蝗乙卯江蘇銅山縣韓家堂河決癸亥裁察哈爾副都統留一員駐張家口九月壬申免甘肅靖

遠等九縣紅水東樂二縣被旱額賦己卯賑山東歷城等五十五縣東昌等五
衛所水災並蠲新舊額賦乙未楊應琚赴永昌受木邦降冬十月己亥上奉皇
太后還京師戊申楊應琚奏整寶景線景海各部頭人內附辛亥韓家堂決口
合龍兵部尙書彭啟豐降補侍郎甲寅以陸宗楷爲兵部尙書壬戌增設雲南
迤南道十一月乙亥楊應琚奏緬甸大小猛育猛答各部頭人內附戊寅以楊
應琚病命楊廷璋赴永昌接辦緬匪癸巳命侍衛福靈安帶御醫往視楊應琚
病十二月乙巳調鄂甯爲湖南巡撫以鄂寶爲湖北巡撫癸丑以巴祿爲綏遠
城將軍是歲朝鮮琉球入貢

三十二年春正月乙亥雲南官軍勦緬匪於新街失利諭楊廷璋回廣東二月
乙未以楊應琚病命其子江蘇按察使楊重英赴永昌襄理軍務丙午雲南官
軍與緬匪戰于底麻江失利逮提督李時升下獄戊申調鄂甯爲雲南巡撫甲
寅莊親王允祿卒丙辰上臨奠己未上巡幸天津癸亥賑奉天承德等五州縣
及興京鳳凰城災民三月乙丑朔上閱子牙河堤召楊應琚入閣辦事以明瑞

爲雲貴總督內寅調託庸爲工部尙書以明瑞爲兵部尙書己巳免直隸全省
通賦庚午上閱天津駐防滿洲兵以阿桂爲伊犁將軍壬申上閱綠營兵庚辰
上還京師辛巳大學士楊應琚褫職壬午以緬匪入寇蓋達隴川宣示楊應琚
貽誤罪狀癸未命鄂密赴普洱辦軍務庚寅以李侍堯爲兩廣總督召楊廷璋
爲刑部尙書癸巳以鄂密署雲貴總督夏四月己酉上詣黑龍潭祈雨庚戌以
雲南邊境瘴盛命暫停進兵庚申命張泰開以禮部尙書管左都御史事嵇璜
署禮部尙書五月己巳以鄂寶爲貴州巡撫定長兼署湖北巡撫庚午以范時
綬爲湖北巡撫調張泰開爲左都御史嵇璜爲禮部尙書壬申命陳宏謀管工
部內子雲南官軍失利于木邦楊密等退師龍陵庚寅李時升朱崙處斬六月
辛酉以額爾景額爲參贊大臣遣赴雲南秋七月福建巡撫莊有恭卒調崔應
階代之以李清時爲山東巡撫裘曰修爲禮部尙書壬午上奉皇太后秋獮木
蘭戊子奉皇太后駐避暑山莊己丑盛京將軍舍圖肯免以新柱代之閏七
月甲寅賜楊應琚自盡丙辰緬匪渡小猛崙江入寇雲南次通八月癸酉調裘

曰修爲工部尙書董邦達爲禮部尙書丁丑上幸木蘭乙酉以鍾音爲廣東巡撫己丑諭明瑞以額勒登額代譚五格分路進兵九月庚子賑湖北江夏等二十七縣武昌等七衛水災甲寅命託恩署兵部尙書冬十月壬戌賜李因培自盡己卯諭明瑞以將軍管總督十一月壬寅賑甘肅平涼等三十四廳州縣被雹災民壬子調鄂寶爲湖北巡撫丁巳密諭明瑞以阿瓦不能遽下退師木邦十二月甲戌楊睿褫職戍伊犁戊寅明瑞奏渡大疊江進軍錫箔波龍等處土司頭人羅外耀等內附

三十三年春正月辛卯明瑞奏克蠻結壬辰封明瑞一等誠毅嘉勇公賜黃帶紅寶石頂四團龍補服丁酉明瑞進軍宋發庚子調彰寶爲山東巡撫以蘇爾德爲山西巡撫丙午盛京將軍新柱卒調明福代之閩浙總督蘇昌卒丁未命阿里袞爲參贊大臣往雲南軍營以崔應階爲閩浙總督富尼漢爲福建巡撫甲寅緬人圍木邦二月丙寅諭用兵緬甸輕敵致衄引爲已過令明瑞等班師額勒登額譚五格褫職逮問命鄂睿回雲南阿里袞署雲貴總督駐永昌緬人

陷木邦珠魯訥死之戊寅上還圓明園丙戌明瑞等敗績於猛育死之召阿桂
來京以伊勒圖署伊犁將軍命傅恒爲經略阿里衮阿桂爲副將軍舒赫德爲
參贊大臣赴雲南以鄂寧爲雲貴總督調明德爲雲南巡撫以福隆安爲兵部
尚書命在軍機處學習行走以永德爲浙江巡撫調彰寶爲江蘇巡撫富尼漢
爲山東巡撫鄂寶爲福建巡撫程燾爲湖北巡撫三月癸巳免山東高苑等三
縣三十二年被水額賦乙巳調鄂寶爲廣西巡撫鍾音爲福建巡撫良卿爲廣
東巡撫錢度爲貴州巡撫巴祿爲察哈爾都統傅良爲綏遠城將軍癸丑免江
西南昌等十三縣三十二年被水額賦夏四月丁卯調錢度爲廣東巡撫己巳
免安徽安慶等七府州屬三十二年被水額賦壬申御試翰林詹事等官擢吳
省欽等三員爲一等餘陞黜有差試由部院入翰林等官擢覺羅學爲一等餘
陞擢有差甲申傑額勒登額於市譚五格處斬乙酉上臨奠明瑞扎拉豐阿觀
音保五月庚申命明德赴永昌乙丑色布騰巴勒珠爾病免以伊勒圖爲理藩
院尚書庚午改命官保署理藩院尚書辛巳以范時綬爲左都御史壬午以阿

桂爲雲貴總督尹繼善高晉以兩淮鹽務積弊匿不以聞均下部嚴議秋七月
癸巳上奉皇太后秋獵木蘭甲午調託庸爲兵部尙書以官保爲刑部尙書仍
兼署理藩院尙書己亥上奉皇太后駐避暑山莊辛丑以伊勒圖爲伊犁將軍
仍兼理藩院尙書壬子紀昀以漏洩籍沒前運使盧見曾諭旨褫職戍烏魯木
齊八月丁卯允俄羅斯于恰克圖通商辛未上幸木蘭行圍壬申直隸總督方
觀承卒以楊廷璋代之調裘曰修爲刑部尙書以蔡新爲工部尙書甲戌李侍
堯奏遼羅爲緬人所破其國王之孫詔萃奔安南河仙鎮土官莫士麟留養之
內地人甘恩敕據遼羅乞封勅嘉獎莫士麟命甘恩敕求其主近支立之不得
自王乞封號己卯加託恩于敏忠崔應階太子太保託庸楊廷璋太子少保九
月戊子以嵩椿署伊犁將軍乙未上回駐避暑山莊戊戌高恆普福諭斬丁未
上奉皇太后還京師以鄂爾爲山西巡撫黑龍江將軍傅僧阿改西安將軍以
傅玉代之冬十月己未免甘肅平涼等十二州縣三十二年被災額賦辛未以
宮兆麟爲廣西巡撫辛巳高恆普福達色處斬改海明等緩決十一月戊戌以

緬人來書不遜諭阿里袞籌進勦十二月己未以富明安爲山東巡撫揆義署湖北巡撫漕運總督楊錫紱卒以梁鴻霖署之乙丑湖廣總督定長卒調吳達善代之彰寶兼署兩江總督明山爲陝甘總督調阿思哈爲陝西巡撫以文綬爲河南巡撫丁卯召明福來京以額爾德蒙額署盛京將軍甲戌賑奉天承德等四州縣水災壬午留阿思哈爲河南巡撫改文綬爲陝西巡撫

三十四年春正月丙戌免雲南官兵所過地方及永昌等三府州本年額賦其非經過地方免十分之五并免湖北湖南貴州三省官兵經過地方本年額賦十分之三庚寅以緬人書詞桀驁命副將軍阿桂與副將軍阿里袞協助傅恆征勦辛卯命明德爲雲貴總督駐永昌喀甯阿爲雲南巡撫壬辰阿里袞等敗緬人於南底壩撥運通倉米二十萬石賑霸州等十二州縣災甲午右部哈薩克阿勒比斯子卓勒齊等來朝乙未調恒祿爲盛京將軍傅良爲吉林將軍常在爲綏遠城將軍辛丑傅恆赴雲南命官保署戶部尙書裁甯夏右翼副都統吉林拉林副都統命常青署綏遠城將軍癸卯賜傅恆御用盔甲戊申命官保

協辦大學士以福隆安署刑部尙書癸丑以南掌國王之弟召翁遣使請兵復仇諭阿桂等預備由南掌分路進兵二月甲寅朔嵇璜緣事降調以程景伊爲工部尙書乙丑以富尼漢爲安徽巡撫癸未命傅恒整飭雲南馬政以諾倫爲綏遠城將軍三月乙酉命伊犁將軍伊勒圖往雲南軍營己丑命伊勒圖爲烏里雅蘇台參贊大臣辛丑正白旗領侍衛內大臣福祿龍以阿桂代之丙午命阿桂署雲貴總督丁未右部哈薩克阿幹里蘇勒等入覲命坐賜茶資冠服有差戊申賑甘肅臬蘭等二十九州縣上年災民蠲安徽合肥等十六州縣及廬州等五衛上年額賦夏四月己未以溫福爲福建巡撫壬申傅恒進兵老官屯阿桂進兵猛密丁丑賜陳初哲等一百五十一人進士及第出身有差五月己丑裁江甯副都統一六月丙辰以阿思哈爲雲貴總督喀爾阿爲河南巡撫丁巳傅恒奏猛密土司內附戊寅湖北黃梅江堤決命湖廣總督吳達善湖北巡撫揆義勘之秋七月丁亥以明德署雲貴總督移駐騰越經理軍務辛卯設伊犁巴彥岱城領隊大臣一傅恒奏猛密土司內附甲午李侍堯奏暹羅仍爲

甘恩敕所踞丁酉禮部尙書董邦達卒己亥調陸宗楷爲禮部尙書蔡新爲兵部尙書以吳紹詩爲刑部尙書海明爲江西巡撫梁國治爲湖北巡撫己酉李侍堯檄莫士麟會暹羅土目討甘恩敕八月乙丑上幸木蘭行圍己巳以蔡琛自縊獄中褫福建按察使孫孝愉職發軍台九月丙戌阿桂進抵蠻暮己丑上回駐避暑山莊己未上奉皇太后回鑾己亥命阿桂伊勒圖自蠻暮迂傳恒會師壬寅命劉統勳會勘山東運河癸卯傳恒奏猛拱土司渾覺率衆來降上嘉之特賞三眼孔雀翎戊申傳恒進抵猛養阿桂奏克哈坎渡江戊申命阿桂據新街勦賊冬十月乙卯命彰寶署雲貴總督明德署雲南巡撫調永德爲江蘇巡撫起熊學鵬署浙江巡撫以增海署伊犁將軍丁巳傳恒奏攻克猛養癸亥梁國治兼署湖廣總督甲子以阿桂不能克老官屯奪副將軍爲參贊大臣命伊勒圖爲副將軍調喀爾阿爲貴州巡撫富尼漢爲河南巡撫以胡文伯爲安徽巡撫乙丑傳恒奏進抵新街命彰寶駐老官屯壬申調永貴爲禮部尙書託庸爲吏部尙書伊勒圖爲兵部尙書以託庸兼署調吳紹詩爲禮部尙書以裘

日修爲刑部尙書十一月乙酉副將軍戶部尙書阿里袞卒於軍命阿桂仍在副將軍上行走並以伊勒圖爲副將軍烏三泰長青爲參贊大臣調官保爲戶部尙書以素爾納爲刑部尙書託恩多署左都御史戊子傅恒等進攻老官屯癸巳以黃登賢爲漕運總督丙申以緬地烟瘴官軍損失大半命班師屯野牛壩召經略傅恒還阿桂留辦善後己亥起觀保署左都御史丁未傅恒等攻老官屯不克其土官以緬酋猛駁蒲葉書詣軍營乞降上命班師十二月辛亥免雲南辦理軍需地方及永昌等三府州明年錢糧十分之五其直隸河南湖北湖南貴州等省官兵經過州縣並免十分之三調官兆麟爲湖南巡撫以德保爲廣東巡撫陳輝祖爲廣西巡撫乙卯傅恒等奏緬酋猛駁稱臣納貢諭俟來京時降旨己巳上以來年奉皇太后謁東陵巡幸天津免經過地方及天津府屬乾隆三十五年錢糧十分之三以阿桂爲禮部尙書

三十五年春正月己卯朔以上六十壽辰明歲皇太后八十萬壽詔普蠲各省額征地丁錢糧一次辛卯以增海爲理藩院尙書丁未授喀爾喀和碩親王成

袁扎布世子拉旺多爾濟爲固倫額駙二月乙丑上奉皇太后謁東陵庚午上奉皇太后回鑾駐盤山壬申以緬酋猛賚貢表不至諭彰寶備之並嚴禁通市三月己卯上奉皇太后還京師起吳紹詩爲刑部郎中辛巳調宮兆麟爲貴州巡撫吳達善以湖廣總督兼署湖南巡撫壬午上奉皇太后謁泰陵巡幸天津丙戌上謁泰陵己丑免經過州縣及天津府屬乾隆三十一年至三十三年積欠地糧銀及常借災借穀石直隸乾隆三十一年至三十三年積欠地糧銀及折色銀兩減直隸軍流以下罪免直隸乾隆三十一年至三十三年因災緩徵銀穀甲午上奉皇太后駐蹕天津府丙申上閱駐防兵經略大學士傅恒還京師命與福隆安俱仍爲總管內務府大臣戊戌調永德爲河南巡撫薩載署江蘇巡撫癸卯上奉皇太后還京師己酉以緬酋索木邦土司線襲團等諭責哈國興粉飾遷就召來京以長青代爲雲南提督己未召傅良來京命富椿爲吉林將軍丙寅天津蝗命楊廷璋督捕庚午上詣黑龍潭祈雨是月蠲浙江仁和等八州縣杭嚴嘉湖二衛陝西定遠縣三十四年被水被雹額賦五月丁丑朔

日食壬午以皇八子擅自進城褫上書房行走觀保湯先甲職並戒諭之乙未以祈雨命刑部清理庶獄減軍流以下罪閏五月丙午朔命裘曰修赴薊州寶坻一帶捕蝗戊申京師大雨己未命溫福爲吏部侍郎在軍機處行走甲子裘曰修以捕蝗不力免調程景伊爲刑部尙書以范時綬爲工部尙書張若淮爲左都御史六月甲申諭阿桂等調海蘭察哈國興進兵丙戌河南永城江蘇碭山安徽宿州等州縣蝗丁亥調官保爲刑部尙書素爾納爲戶部尙書壬辰命豐昇額署兵部尙書甲午貴州古州苗香要等伏誅命侍郎伍納璽往古北口會同提督王進泰查勘水災發帑銀二萬兩卹之並開倉賑糶秋七月乙巳朔李侍堯奏河仙鎮土官莫士麟請宣諭緬番恢復暹羅不許丙午以增海爲黑龍江將軍溫福爲理藩院尙書命和爾精額伍納璽往古北口籌辦河工壬子以小金川與沃克什土司構釁命四川總督阿爾泰傳集小金川土司勸諭之癸丑上臨和親王弘晝第視疾丁巳和親王弘晝卒太保大學士傅恒卒戊午賞來京祝嘏之百十二歲原任浙江遂昌縣學訓導王世芳國子監司業銜並

在籍食俸辛酉以裴宗錫爲安徽巡撫甲子截漕糧二十萬石賑武清等六縣水災以諾穆親爲雲南巡撫八月戊寅以副將軍阿桂辦事取巧褫領侍衛內大臣禮部尙書鑲紅旗漢軍都統以內大臣革職留任辦副將軍事己卯以永貴爲禮部尙書觀保爲左都御史阿爾泰奏僧格桑伏罪交出達木巴宗地方及所掠番民辛巳命劉統勳兼管吏部丙戌萬壽節上詣皇太后宮行禮御太和殿王以下文武各官進表行慶賀禮奉旨停止筵宴命豐昇額在軍機處行走己丑上奉皇太后幸熱河乙未上奉皇太后駐蹕避暑山莊己亥上幸木蘭九月丙午命阿爾泰爲武英殿大學士仍留辦四川總督事戊午上廻駐避暑山莊甲子命高晉兼署漕運總督冬十月癸酉朔上奉皇太后回鑾辛巳召崔應階來京命鍾音署閩浙總督壬午召阿爾泰來京以德福署四川總督吳達善兼署湖南巡撫召薩載來京命李湖署江蘇巡撫甲午阿桂等奏老官屯緬目遣使致書請停今歲進兵允之丁酉大學士陳宏謀以衰病乞休溫旨慰留十二月甲戌免新疆本年額糧十分之三丙子以崔應階爲漕運總督丙戌諭

阿桂彰寶密議進勦緬匪庚寅以李湖爲貴州巡撫

三十六年春正月甲辰免福建臺灣府屬本年額徵粟米乙巳免廣東廣州韶州等府州屬本年官租十分之一廣西桂林七府州屬本年官租及桂林平樂等府州學租十分之三丁未免四川寧遠等四府州屬建昌鎮標各營雷波等廳民番本年額糧己未調德福署雲貴總督命阿爾泰回四川總督任二月甲戌上奉皇太后東巡庚辰命內大臣巴圖濟爾噶勒會同集福繼烏梁海副都統莫尼扎布等互控之案辛巳大學士陳宏謀以病乞休允之加太子太傅免直隸滄州等十五州縣民欠借穀並武清縣本年錢糧十分之五癸未命侍郎裘曰修會同楊廷璋周元理籌辦直隸河工丙戌免山東經過州縣本年額賦十分之三災地十分之五免山東泰安等二縣本年地丁錢糧庚寅免山東濟南各屬民欠借穀及東平州東平所通賦以阿桂請大舉征緬申飭之辛卯免山東濟南等六府屬民欠麥本銀兩命劉綸爲大學士兼管工部于敏中協辦大學士調程景伊爲吏部尙書范時綬爲刑部尙書以裘曰修爲工部尙書丙

申上奉皇太后謁岱嶽廟上登泰山乙巳上至曲阜謁先師孔子廟內午上釋奠先師孔子丁未上謁孔林祭少昊陵元聖周公廟賜衍聖公孔昭煥族人銀幣有差戊申上奉皇太后回鑾乙卯予大學士尹繼善等尙書官保等總督楊廷璋等巡撫鐘音等議叙內閣學士陸宗楷等原品休致戊午以富明安爲閩浙總督周元理爲山東巡撫庚申以甘肅比歲偏災免通省民欠籽種口糧倉穀甲子上至捷地閱堤乙丑納遜特古斯處斬己巳以阿桂奏辨非於本年大舉征緬下部嚴議夏四月辛未朔以李侍堯爲內大臣甲戌命戶部侍郎桂林在軍機處行走丁丑上奉皇太后還京師乙酉以旱命刑部清理庶獄減軍流以下罪直隸亦如之丙戌上詣黑龍潭祈雨壬辰大學士尹繼善卒乙未賜黃軒等一百六十一人進士及第出身有差五月辛丑朔調吳達善爲陝甘總督文綬署之勒爾謹護陝西巡撫調富明安爲湖廣總督永德爲湖南巡撫以何烱爲河南巡撫兼管河務鍾音爲閩浙總督余文儀爲福建巡撫癸卯命減秋審緩決三次人犯罪甲辰諭立決人犯當省刑之際暫緩行刑著爲令乙巳阿

桂以畏憚職降兵丁効力命溫福馳赴雲南署副將軍事壬戌以高晉爲文
華殿大學士兼禮部尙書仍留兩江總督任召阿爾泰入閣辦事以德福爲四
川總督六月辛未直隸北運河決甲戌以努三爲正黃旗領侍衛內大臣戊寅
命巴圖濟爾噶勒赴伊犁辦土爾扈特投誠事宜己卯諭土爾扈特投誠大台
吉均令來避暑山莊朝覲命額駙色布騰巴勒珠爾馳驛迎之壬午致仕大學
士陳宏謀卒癸巳命土爾扈特部衆暫駐博羅博拉以金川土舍索諾木請賞
給革布什咱土司人民命阿爾泰詳酌機宜毋姑息秋七月壬寅阿爾泰等奏
小金川土舍圍攻沃克什命勦之乙巳命侍郎桂林帶銀一萬兩赴古北口會
同提督王進泰賑水災丙午永定河決丁未命舒赫德署伊犁將軍戊申上秋
獵木蘭以小金川復侵明正土司諭阿爾泰等進勦丁巳上奉皇太后啟鑒癸
亥上奉皇太后駐避暑山莊丙寅以此次巡幸木蘭沿途武職懈忽楊廷璋王
進泰等均下部嚴議八月己丑定邊左副將軍喀爾喀扎薩克和碩親王成袞
扎布卒以車布登扎布爲定邊左副將軍額駙拉旺多爾濟襲扎薩克和碩親

王罷德福軍機處行走庚寅召大學士兩江總督高晉來京查勘永定河工命薩載兼署兩江總督壬辰永定河決口合龍癸巳上幸木蘭行圍丁酉命阿爾泰仍管四川總督事召德福回京九月戊戌朔停本年勾決癸卯命理藩院侍郎慶桂在軍機處行走乙巳土爾扈特台吉渥巴錫等入覲賞頂戴冠服有差命副將軍溫福參贊大臣伍岱赴四川軍營會商進剿辛亥封渥巴錫爲烏納恩素珠克圖舊土爾扈特部卓哩克圖汗策伯克多爾濟爲烏納恩素珠克圖舊土爾扈特部布延圖親王舍楞爲青塞特奇勒圖新土爾扈特部弼哩克圖郡王巴木巴爾爲畢錫嘑勒圖郡王餘各錫爵有差甲寅上回駐避暑山莊丁卯以文綬爲四川總督勒爾謹爲陝西巡撫調永德爲廣西巡撫梁國治爲湖南巡撫陳輝祖爲湖北巡撫冬十月戊辰朔以三寶爲山西巡撫己巳上奉皇太后回鑾以舒赫德爲總統伊犁等處將軍伊勒圖爲塔爾巴哈台參贊大臣安泰爲烏什參贊大臣甲戌宥紀昀賞翰林院編修乙亥上奉皇太后還京師己卯高晉等奏桃源廳陳家道口河工合龍上嘉之命高晉表曰修楊廷璋查

勘南運河丁亥召楊廷璋爲刑部尙書以周元理爲直隸總督徐績爲山東巡撫甲午陝甘總督吳達善卒調文經代之十一月己酉董天弼奏攻取小金川牛廠丙辰上奉皇太后御慈寧宮恭上徽號曰崇慶慈宣康惠敦和裕壽純禧恭懿安祺皇太后頒詔覃恩有差以溫福爲武英殿大學士兼兵部尙書桂林爲四川總督丁巳調素爾納爲理藩院尙書以舒赫德爲戶部尙書辛酉皇太后萬壽聖節上詣壽康宮率王大臣行慶賀禮壬戌董天弼進攻達木巴宗失利甲子小金川番復陷牛廠十二月庚午溫福奏進駐向陽坪攻小金川巴朗拉山碉卡不克桂林奏克小金川約叻寨褫四川提督董天弼職以阿桂署之乙亥蠲甘肅隴西等三十三州縣三十三年被水旱雹霜等災額賦丙戌以大金川僧僧格桑遣土目赴桂林軍營獻物命給賞遣歸己丑溫福奏克巴朗拉碉卡癸巳溫福奏進駐口隆宗地方董天弼收復沃克什土司各寨

三十七年春正月辛丑免奉天錦州二府額征米豆免浙江玉環海甯兩廳縣額徵銀穀免山西大同等二府額徵兵餉米豆穀麥並太原等十四府州及歸

化城各屬十分之三壬寅免和林格爾等處及太僕寺牧廠地畝額徵銀並清水河廳額徵銀及太僕寺牧廠地畝額徵米豆十分之三癸卯刑部尙書楊廷璋卒以崔應階爲刑部尙書嘉謨署漕運總督乙巳溫福奏攻克小金川曾頭溝卡了碉卡丁未桂林奏克郭松甲木各碉卡庚戌以恒祿爲內大臣癸丑建烏魯木齊城駐兵屯田癸亥命尙書裘曰修協同直隸總督周元理溶永定河北運河二月丁卯以阿桂爲四川軍營參贊大臣甲戌上幸盤山丙戌上回鑾幸圓明園丁亥以色布騰巴勒珠爾爲四川軍營參贊大臣乙未免陝西西安等十二府州上年額徵本色租糧三月丙申朔免江蘇金壇等十一州縣六年至十年逋賦戊戌以索諾木策凌爲烏魯木齊參贊大臣德雲爲領隊大臣命俱受伊犁將軍節制乙巳以豐昇額爲四川軍營參贊大臣己酉河南羅山縣在籍知縣查世柱以藏匿明史輯要論斬壬子桂林奏攻克大金川所據革布付咱土司之木巴拉等處乙卯溫福奏攻克小金川資哩碉寨丁巳桂林奏攻克吉地官寨溫福奏攻克小金川阿克木雅寨桂林奏攻克革什土司之黨哩

等寨及小金川扎哇窠厓下礮卡夏四月丙寅朔桂林奏攻克小金川仰東山梁等寨歸甘肅節年民欠倉糧三百七十六萬石有奇壬申桂林奏盡復革布什咱土司之地及攻克小金川格烏等處諭溫福桂林進勦索諾木乙亥授李湖雲南巡撫圖思德貴州巡撫壬午改安西道爲巴里坤屯田糧務兵備道甘肅道爲安肅兵備道涼莊道爲甘涼兵備道裁烏魯木齊糧道庚寅賜金榜等一百六十二人進士及第出身有差甲午桂林攻小金川達烏東岸山梁失利五月乙未朔以溫福劾色布騰巴勒珠爾貽誤軍務褫爵職丙申免直隸滄州等十五州縣廳積年逋賦丁酉以舒赫德爲領侍衛內大臣命福隆安赴四川查辦阿爾泰劾桂林乖張捏飾一案命託庸暫兼管兵部尙書素爾訥署工部尙書壬寅命戶部侍郎福康安在軍機處行走癸卯命海蘭察等赴四川西路軍營鄂蘭等赴四川南路軍營調容保爲綏遠城將軍桂林以隱匿挫衄褫職逮問以阿爾泰署四川總督己未上奉皇太后幸避暑山莊甲子湖廣總督富明安卒以海明爲湖廣總督海成爲江西巡撫免直隸大興等十五州縣額賦

有差六月乙丑朔上奉皇太后駐避暑山莊溫福等攻克小金川東瑪寨諭阿桂督上中下雜谷及綽斯甲布各土司進勦金川丁丑蠲甘肅皋蘭等二十五廳縣旱災額賦辛巳盛京將軍恆祿卒調增海代之以傅玉爲黑龍江將軍甲申調文綬爲四川總督海明爲陝甘總督以勒爾謹署之命阿爾泰署湖廣總督丙戌阿爾泰罷調海明爲湖廣總督以勒爾謹署陝甘總督調富勒渾爲陝西巡撫命倉場侍郎劉秉恬赴四川西路軍管督餉辛卯湖廣總督海明卒以富勒渾代之陳輝祖署命巴延三爲陝西巡撫秋七月乙未命刑部侍郎鄂寶赴四川南路軍管督餉授勒爾謹陝甘總督八月己巳阿桂奏攻克小金川甲爾木山梁礪卡以阿桂爲內大臣賞布拉克底土司安多爾恭順名號巴旺土婦伽讓恭懿名號壬申溫福等奏小金川賊襲瑪爾迪克連路海蘭察等敗之己丑小金川犯黨壩官寨阿桂遣董天弼援之九月壬寅溫福奏進至木蘭壩賊燬南北兩山礪卡聚守路頂宗山梁諭嚴防後路阿桂奏綽斯甲布土司分兵進攻勒烏崗上送皇太后回鑾戊申上自避暑山莊回鑾甲寅上奉皇太后

還京師冬十月壬申董天弼奏攻克穆陽岡等卡壬午阿桂奏攻克小金川甲爾木山梁十一月乙未溫福等奏攻克路頂宗及喀木色爾礪寨丙申除四川樂山等九州縣三十五年圯廢鹽井額賦辛丑廣州將軍秦璜以納僕婦爲妾褫職逮訊設涼州副都統裁西安副都統一丙午溫福等奏克博爾根山等礪寨戊申阿桂奏攻克翁古爾壘等城寨己酉命富勒渾赴四川以陳輝祖兼署湖廣總督癸丑阿桂奏攻克得里等礪寨丁巳阿桂奏攻克邦甲拉宗等處那約各寨番人降十二月癸亥阿桂奏攻克僧格宗礪寨癸酉以溫福爲定邊將軍阿桂豐昇額俱爲副將軍舒常海蘭察哈國興俱爲參贊大臣福康安爲領隊大臣復興等爲溫福一路領隊大臣興兆等爲阿桂一路領隊大臣董天弼等爲豐昇額一路領隊大臣賞給綽斯甲布土司工噶諾爾布尊追歸丹名號丙子溫福奏攻克明郭宗等礪卡丁丑阿桂奏攻克美諾礪寨庚辰溫福奏彭魯爾等寨番人就撫辛巳溫福等奏克布朗郭宗底木達礪寨澤旺降僧格桑逃往金川乙酉秦璜以婪贓論斬丙戌授薩載江蘇巡撫丁亥文綬以袒徇褫

職命劉秉恬爲四川總督仍督餉以富勒渾署之

三十八年春正月壬辰召永德來京調熊學鵬爲廣西巡撫三寶爲浙江巡撫
鄂寶仍授山西巡撫以小金川平緩四川官兵經過之成都等五十一廳州縣
三十八年額賦及分辦夫糧之溫江等九十廳州縣三十七年蠲剩額賦番民
賦貢一體緩之溫福等進勦金川分由喀爾薩爾喀拉依綽斯甲布三路進兵
甲辰哈薩克博羅特使臣入覲以阿爾泰焚賊賜自盡戊午調永貴署戶部尙
書以阿桂爲禮部尙書二月庚申朔諭溫福等檄索諾木擒獻僧格桑三月庚
寅朔日食壬辰上詣泰陵奉皇太后巡幸天津免所過地方及天津府屬本年
錢糧十分之三癸巳上閱永定河隄丁酉上謁泰陵戊戌上命簡親王豐訥亨
奉皇太后自暢春園啓鑾免蹕路所經之宛平等二十州縣及天津府屬各州
縣三十三年至三十六年通賦己亥免直隸三十三年至三十五年通賦庚子
上閱淀河乙巳上奉皇太后駐蹕天津己酉上奉皇太后廻鑾免通州寶坻等
九州縣三十六年通賦壬子上閱永定河丙辰上奉皇太后還京師閏三月己

已以扎拉豐阿爲御前大臣命劉統勳等充辦理四庫全書總裁乙酉以素爾訥署工部尙書夏四月戊戌以綽克托爲烏什參贊大臣庚戌命索琳以署禮部侍郎在軍機處行走辛亥命慶桂以理藩院侍郎副都統爲伊犁參贊大臣丙辰諭高晉賑清河等州縣及大河長淮二衛被水災民戊午加大學士溫福戶部尙書舒赫德工部尙書福隆安太子太保禮部尙書王際華工部尙書裘曰修太子少傅禮部尙書阿桂署兵部尙書豐昇額直隸總督周元理閩浙總督鍾音四川總督劉秉恬太子少保五月辛酉工部尙書裘曰修卒以嵇璜代之丙寅上奉皇太后啟鑾免經過地方本年錢糧十分之三壬申上奉皇太后駐蹕避暑山莊乙亥盛京將軍增海卒調弘晌代之丁丑改烏魯木齊參贊大臣爲都統以索諾木策凌爲之仍聽伊犁將軍節制己卯猛遮土目叭立齊等內附癸未召車布登扎布來京命拉旺多爾濟署烏里雅蘇台將軍乙巳阿桂等奏金川番賊陷喇嘛寺糧台襲據底木達布朗郭宗己酉鄂寶奏金川番賊襲據大板昭壬子定邊將軍溫福四川提督馬全署貴州提督牛天昇敗績于

木果木俱死之癸丑以阿桂爲定邊將軍贈溫福一等伯小金川僧格桑父澤旺伏誅大學士劉綸卒甲寅以富勒渾爲四川總督起文綬爲湖廣總督丙辰阿桂奏勦洗小金川番賊盡燬碉寨諭嘉之秋七月戊午朔召舒赫德來京以伊勒圖爲伊犁將軍慶桂爲塔爾巴哈台參贊大臣己未金川番賊陷美諾明郭宗海蘭察退師日隆諭阿桂由章谷退師豐昇額退駐巴拉朗等處癸亥命富德爲參贊大臣赴軍營命阿桂撤噶爾拉之師甲子命舒赫德爲武英殿大學士調阿桂爲戶部尙書永貴爲禮部尙書丙寅齊齊哈爾蝗丁卯以溫福乖方債事革一等伯爵仍予卹典視劉秉恬職命議卹木果木陣亡提督馬全牛天昇副都統巴朗阿爾素納總兵張大經及各文武員弁丙戌諭阿桂先復小金川分三路進勦八月戊子以阿桂爲定西將軍命于敏中爲文華殿大學士舒赫德管刑部劉統勳專管吏部己丑命程景伊協辦大學士調王際華爲戶部尙書蔡新爲禮部尙書嵇璜爲兵部尙書以閻循琦爲工部尙書戊戌以明亮爲定邊右副將軍富德爲參贊大臣壬寅上幸木蘭行圍九月壬戌降海

蘭察爲領隊大臣甲子上回駐避暑山莊戊辰上送皇太后回鑾己巳索諾木
袞僧格桑結大金川以其兄阿達克往美諾諭阿桂乘機收復九戶部請開金
川軍需捐例壬申上自避暑山莊回鑾甲戌以多敏爲科布多參贊大臣車木
楚克扎布爲烏里雅蘇台參贊大臣戊寅上奉皇太后還京庚辰吏部尙書託
庸致仕調官保爲吏部尙書以英廉爲刑部尙書仍兼管戶部侍郎事冬十月
乙巳和碩誠親王允祕卒己酉褫車布登扎布定邊左副將軍職仍留親王銜
以瑚圖靈阿代之十一月丁卯阿桂等奏進勦小金川攻克資哩山梁等處收
復沃克什官寨戊辰命福祿往西甯辦事召伍彌泰回京己巳阿桂等奏克復
美諾命進勦金川辛未軍機大臣大學士劉統勳卒上親臨賜奠贈太傅壬申
召梁國治來京在軍機處行走調巴延三爲湖南巡撫以畢沅爲陝西巡撫癸
酉明亮等奏克復僧格宗等碉寨十二月癸巳以彰寶爲雲貴總督辛丑命李
侍堯爲武英殿大學士仍管兩廣總督事是歲朝鮮安南來貢

三十九年春正月丙子以姚立德爲河東河道總督丁丑阿桂等克贊巴拉克

等山梁二月甲申朔命豐昇額等助阿桂進攻烏勒圍丁亥明亮等奏克木谿
等山梁戊戌豐昇額等克莫爾敏山梁乙巳蜀江蘇山陽等十州縣衛三十八
年水災額賦有差丁未上詣東陵並巡幸盤山庚戌謁昭西陵孝陵孝東陵景
陵至孝賢皇后陵奠酒臨故大學士公傅恒塋賜奠辛亥上駐蹕盤山三月庚
申阿桂等克羅博瓦山梁加阿桂太子太保以海蘭察爲內大臣額森特爲散
秩大臣甲子上幸南苑行圍辛未阿桂等克得斯東寨庚辰明亮等克喀咱普
等處上嘉賚之夏四月乙酉順天大興等州縣蝗辛亥以京師及近畿地方旱
命刑部清理庶獄減軍流以下罪直隸如之戊戌以御史李漱芳劾福隆安家
人滋事上嘉之予叙五月癸丑朔命刑部減秋審朝審緩決一二次以上罪丙
寅彰寶以病解任以圖思德署雲貴總督戊辰上奉皇太后秋獵木蘭甲戌上
奉皇太后駐蹕避暑山莊癸卯阿桂等奏克穆爾渾圖碯卡秋七月甲寅阿桂
等克色溇普山碯卡己未阿桂等克喇穆喇穆山等碯卡壬戌阿桂等克日則
雅口等處寺碯乙丑烏魯木齊額魯特部蝗庚午明亮等克達爾圖山梁碯卡

甲戌以于敏中未奏太監高雲從囑託公事下部嚴議以阿思哈爲左都御史
乙亥命阿思哈在軍機處行走太監高雲從處斬辛巳阿桂等克格魯瓦覺等
處磔寨八月壬午朔日食壬辰富德等克穆當噶爾羊圈等處磔卡丁酉上幸
木蘭行闡癸卯金川頭人綽窩斯甲降獻賊日僧格桑屍九月乙卯山東詳張
縣奸民王倫等謀逆命山東巡撫徐績勦捕之丁巳命大學士舒赫德赴江南
同高晉塞決口戊午上回駐避暑山莊命舒赫德先赴山東勦捕王倫庚申命
額駙拉旺多爾濟左都御史阿思哈帶侍衛章京及健銳火器二營兵往山東
會勦王倫辛酉王倫圍臨清屯開口壬戌上送皇太后回鑾癸亥以天津府七
縣旱命撥通倉米十萬石備賑丙寅上自避暑山莊廻鑾丁卯山東兗州鎮總
兵惟一德州城守尉格圖肯以臨陣退避處斬庚午以江蘇山陽等四縣水災
命免明年額賦壬申上奉皇太后還京師丙子山東臨清賊平王倫自焚死冬
十月辛巳朔以楊景素爲山東巡撫壬辰免臨清新城本年未完額賦并舊城
未完額賦十分之五丙午以徐績爲河南巡撫十一月癸丑明亮等克日旁等

碯寨甲寅以舒赫德爲御前大臣阿桂等克日爾巴當噶碯寨以阿桂爲御前大臣海蘭察爲御前侍衛丙辰以四川成都等一百四十府廳州縣行軍運糧免歷年額賦有差戊辰阿桂克格魯古了日等處碯寨是歲朝鮮琉球來貢四十年春正月甲戌阿桂等克康爾薩山梁二月己卯阿桂等克甲爾納等處碯寨丙戌阿桂克斯莫思達碯寨癸巳以李瀚爲雲南巡撫三月辛亥上幸盤山甲寅上駐蹕盤山蜀江南旬容等十九州縣淮安大河二衛三十九年水旱災額賦壬申蜀長蘆屬滄州等六州縣嚴鎮等六場河南信陽等五州縣三十九年旱災額賦丙戌四川軍營參贊大臣領侍衛內大臣和碩親王固倫額駙色布騰巴珠爾卒己丑命明山爲烏里雅蘇臺參贊大臣壬寅賜吳錫齡等一百五十八人進士及第出身有差癸卯阿桂等克木思工噶克了日等處城碯明亮等克甲索宜喜乙巳明亮等克達爾圖等處碯寨以明亮福康安爲內大臣五月己酉蜀直隸朔州保定等三十九州縣三十九年旱災額賦甲寅阿桂等

奏克巴木通等處碯卡丁巳明亮奏克茹寨甲索等處碯卡戊辰阿桂等奏克
噶爾丹等處寨壬申上幸木蘭奉皇太后駐湯山行宮明亮等奏克巴舍什等
處碯寨乙亥阿桂等奏克遜克爾宗等處碯寨加封定邊右副將軍果毅公豐
昇額爲果毅繼勇公六月丁丑朔噶湖北漢陽等十五州縣武昌等六衛一所
三十九年旱災額賦戊寅上駐避暑山莊癸未上詣廣仁嶺萬壽亭迎皇太后
駐蹕避暑山莊壬辰以豐昇額爲兵部尙書丙申領隊大臣額爾特禪職逮治
庚子設管理烏魯木齊額魯特部落領隊大臣以全簡爲之秋七月壬戌阿桂
等奏攻克崑色爾等處山梁碯寨丁卯阿桂等克章噶等處寨額洛木寨頭人
革什甲木參等率衆來降庚午蠲甘肅臯蘭等七廳州縣三十九年被水被旱
額賦阿桂等克直古腦一帶碯寨八月丙子朔日食丁丑阿桂等克隆斯得寨
明亮等克扎烏古山梁己卯以朔州等三十餘州縣被水撥直隸藩庫銀五十
萬兩賑之辛卯上幸木蘭行圍己亥阿桂等奏克勒烏圍之捷進勦噶喇依賊
寨上命優敘將軍阿桂副將軍豐昇額參贊大臣海蘭察額森特等功辛丑召

舒赫德赴熱河行在癸卯封羅卜藏錫喇布爲貝子乙巳命侍郎袁守侗等赴貴州讞知府蘇瑤稟揭總督藩臬袒護同知席纘一案九月庚戌蜀湖北鍾祥等十二州縣並武昌等七衛三十九年旱災額賦癸丑上回駐避暑山莊丁巳上送皇太后回鑾辛酉以圖思德劾蘇瑤浮收勒索命袁守侗等嚴鞫之內寅以明亮請赴西路失機嚴斥之仍奪廣州將軍丁卯上奉皇太后還京師阿桂等克噶克當底等處碉寨己卯召駐藏辦事伍彌泰以留保住代之己丑以邕州等六州縣被災較重命卽於閏十月放賑庚寅蜀甘肅臯蘭等十七州縣水雹霜災額賦壬辰上還宮丙申調裴宗錫爲貴州巡撫命袁守侗暫署圖思德署雲南巡撫李質穎爲安徽巡撫閏十月壬子蘇瑤以侵稅誣訐處斬壬戌明亮等奏克扎烏古山梁甲子阿桂等奏克西里山黃草坪等處碉卡總兵曹順死之命袁守侗赴四川同阿揚阿讞冀國勳一案復封慶恆爲克勤郡王壬申明亮等克耳得谷寨十一月明亮等克甲索諸處碉卡乙酉福祿以立塔爾一案未能鞫實革成伊犁己丑阿桂克西里第二山峯並進圍瑪爾塞落壬

辰明亮等奏克爾甲爾古等處碉卡壬寅阿桂等奏克舍勒固租魯科思果木
阿爾古等處碉寨十二月甲辰朔日食丁未工部尙書閣循琦卒調嵇璜爲工
部尙書蔡新爲兵部尙書以曹秀先爲禮部尙書阿桂等克薩爾奎等寨落丙
辰以阿桂爲鑲黃旗領侍衛內大臣調熊學鵬爲廣東巡撫以吳虎炳爲廣西
巡撫甲子明亮等由達撒谷進兵連克險要山梁及沿河格爾則寨落丙寅阿
桂等克格隆古等處寨落庚午阿桂等由索隆克進據噶占山梁直擣噶喇衣
其頭人色木里雍中及布籠普阿納木來降壬申明亮等克甲雜等隘口並後
路巴里布日蓋古洛進抵獨松隘口剋日會擣噶喇依其頭人達固拉得爾瓦
等來降